

四庫全書

史部

欽定四庫全書

史部

至大金陵新志卷

十至
十二下

詳校官編修_臣曹振鏞

檢討_臣德生覆勘

總校官檢討_臣何思鈞

校對官助教_臣陳木

謄錄監生_臣王侶

欽定四庫全書

至大金陵新志卷十

兵防志

元 張鉉 撰

兵者聖人所以討強暴平亂世夷險阻拔危殆恒不得已而用之觀其本起於陰陽之相勝善暴之相形而濟之以凶器故善用兵者必審天時察地利順民心三者皆得則可以戰敵而亦聖人所慎吳晉六朝建都江左

天下望為正統文物殷富寶器在焉然其分裂之際毒
民於兵其備禦大要在於據江防淮治城浚隍以逸待
勞攻不足而守有餘至其道窮數極中國舉之若摧枯
振槁故曰堅革利兵不足以為勝高城深池不足以為
固嚴令繁刑不足以為威由其道則興不由其道則廢
宋自高宗南渡以建康為陪都總以重臣宿兵峙糧常
數十萬及天兵下襄樊沿江諸將或降或遁不數月而
社為墟曩之治險畜兵其勝安在今天下一統城郭溝

池悉廢為畊藝而中土之兵分翼鎮守裝出其家米鹽
仰給縣官統屬器械各有名籍不著著其設置巡防大
較作兵防志

自形勢至戰艦皆據
舊志纂述以備參攷

形勢

諸葛亮曰鍾阜龍盤石城虎踞真帝王之宅 李綱曰
天下形勝關中為上建康次之宜以長安為西都建康
為東都 衛庸敏曰建康實古帝都外連江淮內控湖
海為東南要會之地 劉珣曰金陵天險前據大江可

以固守 張浚曰東南形勢莫重於建康實為中興根本 陳亮曰舊日臺城在鍾阜之側據高臨下東環平岡以為安西城石頭以為重帶玄武湖以為險擁秦淮青溪以為阻是以王氣可乘而運動如意 江默曰自淮而東以楚泗廣陵為之表則京口秣陵得以蔽遮自淮而西以壽廬歷陽為之表則建康姑孰得以襟帶表裏之形合則東南之守不孤其來尚矣餘見江防

攻守

張敦頤曰晉慕容謨曰時有否泰道有屈伸暴逆之寇雖終滅亡方其強盛皆當詘而避之要終歸於大濟而已為今之計莫若養威以俟時王羲之曰以區區江左營綜如此天下寒心久矣中興之業政以道勝寬和為本力爭武功非所當作二人者能言之而不得行之行之而足以安江南者孫權一人耳陸瑁嘗勸權曰九域盤互之時率須深根固本愛力惜費陸遜嘗勸權曰施德緩刑寬賦息調權報之曰發調者蓋謂天下未定事以

衆濟若徒守江東修崇寬政兵自足用何以多為顧坐
自守可陋爾以此知權之志未嘗不在於天下然以傳
攷之亦未嘗肯求逞於中原曹公來侵則破之拒之而
已治艦立塢築堤遏湖作涂塘明烽燧始終所以備魏
者至矣及移牋於曹公曰足下不死孤不得安則權固
未嘗得志也嘉禾中因蜀寇魏一攻淮南聞明帝東行
遽則歛避諸將之攻樊城司馬懿救之亦引軍亟退自
後觀之謂之怯可也而權不以為耻豈非天下之勢既

未有可投之隙與其力爭而取敗不若退守而待時也耶
史稱權繼父兄之業有臣以為腹心股肱爪牙兵不妄動
故戰少敗而江南安此權之所以為治也及嗣主立諸葛
恪為政首侵邊以怒敵東興之戰幸捷顧不能持勝復違
衆大舉一敗塗地恪既喪軀而孫氏之業因以衰焉則權
之兵不妄動利害果何如也其後孫皓用諸將計數侵盜
晉鄙陸抗曰苟無其時雖復大聖亦宜養威自保不可輕
動今不務力農富國審官任能明黜陟慎刑罰訓諸司以

德拊百姓以仁而聽諸將徇名窮兵黷武動費萬計士卒
凋弊寇不為衰而我已大病矣夫爭帝王之資而昧十百
此人臣之姦便非國家之良策也抗之言兼有陸瑁陸遜
蔡謨王羲之論而皓不知用此其所以亡也東晉自庾亮經
營征伐皆不能有成謝安父子乘苻堅傾敗之餘圖之如恐
不及至於渡河入鄴訖無尺寸之得宋文自恃富强加兵元
魏擅道濟再行無功諸將以敗繼敗而邊塵遂至爪
步梁武遭魏世之亂陳慶之以數千兵入洛而嵩高之

襲幾至殲盡及貪河南之地納叛將棄睦鄰而身國顛
覆陳宣帝闢土宇於北齊旋失淮泗於後周雖以桓溫
劉裕非常之才度越歷代諸將而溫伐苻健慕容暉皆
幾成而敗裕平南燕滅姚秦亦既得而失則六朝用兵
攻伐之策可見矣

古今論守國事宜范蠡最高
陸抗所言次之餘非確論也

江防

吳聿曰江出岷山自湖口合流而下奔放蕩涵吐吞日
月山或磯之則其勢悍怒觸舞大舩兀若轉捩至其廣

處曠數百里斷岸相望僅指一髮而舳艫上下中流遇風則四顧茫然亡所隱避自金陵抵白沙其尤者為樂官山李家漾至急流濁港口凡十有八處稱號老風波而玩險阻者至是鮮不袖手 吳志曰魏文帝有渡江之志望江水盛長瀰漫數百里便引退自歎曰魏雖有武騎千羣無所用也 千寶晉紀曰魏文帝之在廣陵吳人大駭乃臨江為疑城自石頭至于江乘垣以木植衣以葦席加采飾焉一夕而成魏人自江北望甚憚之

曰彼有人馬未可圖也乃還 宋書元嘉二十七年魏人聲欲渡江太祖大具水軍為防禦之備領軍將軍劉遵考左將軍尹弘守橫江少府劉興祖守白下建威將軍黃門侍郎蕭元邕守裨洲羽寺左監孟宗嗣守新洲上建武將軍泰容守新洲下征北中兵叅軍向柳守貴洲司馬到元度守蒜山諮議叅軍沈曇慶守北固尚書褚湛之先行京陵使仍守西津徐州從事史蕭尚之守練壁征北叅軍管法祖守譙山徐州從事武仲河守博

落尚書左丞劉伯龍守采石尋遷建武將軍淮南太守
仍總守事遊邏上接于湖下至蔡洲陳艦列營周亘江
畔自采石至暨陽六七百里船艦蓋江旗甲星燭皇太
子出戍石頭徐湛之守石頭倉城 齊書建元元年魏
主宏聞太祖受禪其冬發衆遣丹陽王劉昶寇司豫二
州明年詔衆軍北討初虜寇至緣淮驅畧江北居民猶
懲佛狸時事皆驚走不可禁止乃於梁山置二軍南置
三軍慈姥置一軍烈洲置二軍三山置二軍白沙置一

軍蔡洲置五軍長蘆置三軍徐浦置一軍以備之魏不能攻周世宗問江南虛實孫忌荅曰本國雖小甲兵尚三十萬世宗曰江南不過十數郡何見欺也忌曰精兵雖止十餘萬然長江一條飛湍千里險過湯池可敵十萬之師國老宋齊丘乃王猛謝安之徒又可敵十萬張虞卿曰歷考前世南北戰爭之地魏軍嘗至瓜步矣石季龍嘗至歷陽矣石勒寇豫州至江而還此皆限於江而不得騁者也然江出岷山跨郡十數備之不至

一處得渡皆為我憂使吾斥候既明屯戍惟謹士氣振而人心固矣恃江為阻可也雖無長江之險亦可也苻堅百萬之衆馬未及一飲江水謝玄八千銳卒破之於淮淝豈非其效歟不然五巢以奇兵八百泛舟即渡吳人有北來諸軍乃飛過之語韓擒虎以五百人宵濟采石守者皆醉遂襲取之由是觀之徒恃江而不足與守鮮克有濟矣曹操初得荊州議者謂東南之勢可以拒操者長江也操既得荊州蒙衝戰艦浮江而下則長江

之險已與我共之獨周瑜謂捨鞍馬而仗舟楫非彼所長赤壁之役果有成功至於羊祜之言則以南人所長惟在水戰一入其境長江非復所用他日成功畧如祜言故臣以謂有如瑜者為用則祜之言謂之不然可也無如瑜者則祜之言不可不察也彼為說者謂敵人以馬為強而江流迅急渡馬為難敵人便於作棹而江流迅急非棹能濟是未知侯景以馬數百一夕而渡王濬自上流來未嘗作棹也州縣一也有最為要害者津渡

一也有最宜備豫者苻堅自項城來壽陽侯景自壽陽
移歷陽孫恩自廣陵趨石頭王敦渡竹格蘇峻泛橫江
侯景渡采石考前世盜賊與夫南北用兵由壽陽歷陽
來者十之七由橫江采石渡者三之二至於據上流之
勢以窺江左者未論也 建炎三年冬金兵自黃州渡
又自馬家洲渡時杜充在建康聞金人至以軍六萬列
戍江南岸而閉門不出師無統一皆無關志明年夏四
月韓世忠提舟師截大江以邀金兵相持黃天蕩四十

八日烏珠遣使與世忠約日會戰世忠募海船百餘艘進

泊金山下仍植一旗書姓名表其上金人望見大笑曰

此吾几上肉耳

按宋史世忠伏兵金山廟幾獲烏珠

世忠預命工鍛鐵相

聯為長綆貫一大鉤徧授諸軍之強壯者平旦敵擁十

舟噪而前比合戰世忠分海船為兩道出其背每縋一

綆則曳一舟而入敵不得渡遣使願還所掠及獻馬三

千世忠不聽曰只留下烏珠乃可去時達蘭所遣之兵

在儀徵江南北兩岸皆敵衆世忠據中流風帆浪擲飄

忽若神鳥珠閉壘不敢出謂諸將曰使船如使馬何以

破之乃欲自建康謀北歸

烏珠兵在南岸故自鎮江沿江西上求濟

凡古津渡

又被世忠八面控扼不得去或獻謀於蘆場地鑿大渠

二十餘里

今蘆門河是在黃天蕩南

上接江口舟從江背出世忠之

上流一夜渠成次早出舟世忠大驚尾擊敗之敵終不

得濟

按宋史金人悉趨建康於治城西南鑿渠則今新開河是故汪藻謂開兩河也

一日敵乘

天霽無風我所用海舟皆不得動彼乃以輕舫絕江而

遁世忠戒其下勿追使去烏珠回江北屯六合達蘭在

山東遣人誚烏珠入侵無功蓋止於淮東候秋高相會
再侵江南烏珠以前日渡江之危為辭呂頤浩言金人
多詐難測詔劉光世分兵以備江岸 紹興三十一年
金萬戶高景山以兵數萬犯揚州劉錡提大軍禦之於
清河金以氈裹舟載糧挽而上錡募善沒者鑿舟沉之
金人大驚俄犯揚子橋錡以兵扼瓜州金騎逼江錡遣
麾下負琦設伏於皂角林與敵接戰誘敵入張弩俄發
敵大敗斬景山俘數百人金亮親統細軍駐和州之鷄

龍山臨江築壇刑馬祭天必欲由采石而渡朝廷詔王
權詣行在以池州都統制李顯忠代權命督府參議官
中書舍人虞允文趣顯忠交權兵時顯忠未至允文夜
見建康留守張燾議禦敵之計燾但言已當死守留鑰
丙子金亮登壇建黃綉旗二中張黃蓋亮執小紅旗麾
衆渡江時王權所留水軍車船咸在而諸將未有統屬
莫肯用命盡伏山崦惟提舉張振王琪稍任其責允文
自建康至使人督之敵舟稍近振琪與統制時俊盛新

等徐出山崦列布江岸敵初未之覺一見大驚欲退不
可我軍用海鯨船迎擊士皆死鬪敵舟沉溺者數萬其
回北岸者亮皆殺之遂不能濟丁丑金人往來望見車
船遽却我軍復以海鯨船先往北岸截橫林渡口用克
敵弓射之金兵棄船上岸者悉陷泥中而斃上急差楊
存中措置守江虞允文亦自建康馳至鎮江時江岸有
車船二十四艘敵已瞰江恐臨期不堪駕用存中允文
臨江按試命戰士踏車船徑趨瓜洲迫岸復回金兵皆

持滿以待其船中流上下回轉如飛金衆相顧駭愕亮
愈忿召諸帥約三日畢濟過期盡殺之諸帥謀曰南軍
有備如此進有滄殺之禍退有敲殺之憂奈何有總管
萬戴者曰殺郎主與南宋通和則生矣衆曰諾乙未諸
帥集兵射殺亮并殺其太傅三妃與謀事者十餘人
紹興中詔沿邊修守備吳表臣言大江之南上自荆鄂
下至常潤其要緊處不過七渡下流最緊者二建康之
宣化鎮江之瓜洲是也當擇官兵修器械以謹其防

王彥恢言建康古都乃用武之地欲保建康必內以大
江為之控扼外以淮甸為之藩籬又必措置兵食以贍
國費然大江以南千里浩渺決欲控扼非戰艦不可大
江以北萬里坦途欲遏長驅非戰車不可舒廬滁和良
疇百萬欲措置軍食非營田不可舟車之法以輕捷為
上彥恢所制飛虎戰艦傍設四輪每輪八楸四人旋轉
日行千里又有神武戰車下安四輪畧同飛虎頂張布
帷以避矢石傍斜衝擊其用如神又有拒馬車一人之

力可以轉用比之蒙衝偏箱鹿角此尤至要淮西良疇不可以數計不須朝廷給本祇以有無相濟併力營田計其戶口什一養兵則淮西可以守矣如許令彥恢招兵教習只乞那融淮西數州財賦可足舟車之用及以數州秋成所得那融營田可足兵食之費萬一金人入侵及盜賊猖獗彥恢當以此舟車摧鋒陷陣以此士卒斬將寨旗以此種蒔飛芻輓粟保守江淮決無疎失詔彥恢就本軍措置 宋之論邊防要害者有曰自古倚

長江之險者屯兵據要雖在江南而挫敵取勝多在江北故呂蒙築濡須塢而朱桓以偏將卻曹仁之全師諸葛恪修東興堤而丁奉以兵三千破胡遵之七萬轉弱為強形勢然也淮南郡縣不必盡守故城各隨所在擇險據要置寨柵守以偏將敵來仰攻固非其利若長驅深入則我綴其後二三大將浮江上下為之聲援敵之進退落吾計中萬全之策也又有曰無為軍巢縣之濡須及東西關山川重復蓋昔人尺寸必爭之地大率巢

湖之水上通焦湖濡湏正扼其衝東西兩關又從而左
右輔翼之餽舟既已難通故雖有十萬之師未能便出
大江得逞其志淮西雖號地平而水陸要害皆可戰守
稍加措置未易輕犯又有曰若金重兵出淮西則池州
軍出巢縣而江州軍出無為軍便可為淮西官軍之援
又有曰自建康至姑孰一百八十里其險可守者有六
曰江寧鎮曰硤沙夾曰采石曰大信口其上則有蕪湖
繁昌皆與淮南對境其餘皆蘆荻之場或碕岸斗絕水

勢湍險難施舟楫又有曰采石渡在太平州界下馬家渡在建康府界上宣化渡在府界下采石江濶而險馬家渡江狹而平相去六十里皆與和州對岸昔金人入侵直犯馬家渡杜充以萬衆不能捍亦嘗分兵犯采石太平州以鄉兵禦之遂退雖杜充處置有未盡善亦形勢使然馬家渡比采石尤為要害又有曰和州烏江縣界可自江北車家渡徑衝建康府馬家渡滁州全椒縣可自江北宣化渡徑衝建康府之靖安兼泗州盱眙有

徑小路由張店上下瓦梁盤城亦可徑至宣化不滿三百里烏珠曾於此路來至六合下寨并自上瓦梁下船直至滁河口可以入江宜於靖安渡礪沙夾相對三處防守所有北岸滁河口宣化兩處來路應和州東地分

宜嚴切隄防

又有曰昨來金人自黃州張家渡渡江由湖北鄂州武昌縣上岸方入興國軍大治

縣界取山路以犯江西宜於興國軍大治縣通山等處擺布防拓又有言曰漢陽沌口係漢江下流湖北師司

所隸尤宜嚴切隄防隆興二年議幸建康張浚受任督府講論軍

務不遑寢食招來山東淮北忠義之士以實建康鎮江

兩軍凡萬二千餘人萬弩營所招淮南壯士及江西羣盜又萬餘人要害之地城壁皆築其可因水為險者皆積水為堰置江淮戰艦諸軍弓矢器械悉備兩年冬金人屯重兵十萬于河南為虛聲脅和有刻日決戰之語將士望金人至成大功而金人亦知宋有備卒不敢動及是浚又以宰相來撫諸軍將士踴躍思奮敵聞浚來亦撤宿州之兵歸南京沿邊清野以俟淮北來歸者旦夕不絕山東豪傑悉願受節度金人益懼

分屯建寨建康太平池三

郡江而計一千七十一里共建大小二十九建康八屯
曰下蜀曰馬家步曰沙河曰韓橋曰玉沙曰新開河曰
下三山曰汪蔡港太平七屯曰濮家圩曰褐山曰烏石
磯曰白泥浦曰上三山曰板子磯曰周家莊池州十四
屯曰菖蒲山曰大通曰梅根曰穴港曰戚家溝曰李三
河曰寶寨磯曰黃石磯曰吉陽汛曰祝家磯曰烏石磯
曰香口曰雙山三郡諸屯共創寨屋一萬一千九十五
間本府一千七百間太平四千四百間池州四千八百
間將佐衙屋不計焉今各處萬戶府差軍守把多
係前代屯戍之地亦有廢不守者此不及詳著

營寨教場

潘家寨在上元惟政鄉開寶中潘美下江南駐兵有潘
亭塘去城十里都監寨在上元縣地太平興國元年置

侍衛馬軍與都統司叅錯如古南北軍之制各以統制
統領出三衙馬帥領之號行司乾道七年移屯置寨建
康凡八其選鋒軍寨在西門崇道橋前右中左後五軍
寨一在虎頭山一在黃家塘南一在塘北一在陰山東
者並南門外蔣山南者在東門外駐劄御前諸軍各有
統制統領官置都統制副都統制領之紹興十二年移
屯建康置寨凡六其遊奕軍前右中左後軍寨一在清
化坊之北新街一在桐樹灣北一在高陽樓及東門外

一在保寧寺街一在北門內大街東一在上元縣之西
景陽臺之南廂禁軍營屋始皆草覆紹興中章森易以
瓦數千間號新營其禁軍曰武雄第一指揮威果第十
三第十四第十五第四十四指揮忠節第十一指揮全
捷第六指揮有馬雄畧第十一指揮橫江水軍三指揮
忠義指揮等諸營一在廣濟新倉東一在證聖院東一
在院西一在轉運衙西一在太平橋北一在清化市南
之下街西一在總領衙後通附營凡七其廂軍効勇第

一第二牢城第一第二指揮刺負指揮營並在城內西北隅沿江制置司諸軍寨其遊擊軍前右中左後五軍寨一在武定橋南一在橋西北一在北門內二在桃源洞有叅議官胡居仁撰記遊擊軍新寨在馬帥衙東開慶元年馬光祖建買民地拓基五百二十畝屋三千間制領將佐衙十一所屋一百三十間點亭廟寨門共四十間甃井廿五亭十二防江軍寨在北門外耆閣山下効用軍寨三在直街之能仁寺後武定橋南小寨在羅

帛市破敵軍寨在大西門裏精銳軍寨在都統衙後親
兵左右部營在鹿苑寺側策勝軍中軍寨在城內東北
角右軍寨在北門城內制効軍寨一在虎頭山一在城
內杏花村龍灣遊擊水軍寨在靖安鎮靖安唐灣水軍
寨在古龍灣茅草岡義士雄武二軍附遊擊軍寨江東
安撫司親兵寨史正志建在府治東後廢劉珙復建為
兩寨在宮城東及北慶元乙卯守臣張杓復建軍房甲
仗庫合千二百八十七楹又建亭為主將號令點集之

所東曰觀禮西曰教忠游九言撰記淮西江東總領所
總効軍寨凡四一在江寧縣北真武廟南一在興嚴寺
北一在馬司選鋒寨東一在報恩觀東北諸軍教場有
三御教場在行宮東親兵教場在府治東中軍教場在
蔣山東乾道志禁軍東南第五將正副將各一員及兵
馬鈐轄分管之廂軍兵馬都監四員及駐泊兵馬都監
分管之又慶元志嘉祐四年江寧府就置禁軍駐泊三
指揮以威果為額熙寧五年以議者言東南兵寡而多

盜又以三千人戍揚州杭州江寧府自章森建新營隸兵者始不與居民雜比又江東轉運司嘗於江寧府聚十州兵祇備上綱置小營見王逢原廣陵集句容有管界下蜀東陽三寨漂水有管界巡檢寨在棲賢橋西漂陽有山前巡檢寨在縣北三十五里舊縣巡檢寨在縣

西四十五里

今益都萬戶唐公廨即舊遊擊軍寨地北門大街舊淮捷寨翔鸞坊小馬司寨今並

為軍營太馬司寨街舊遊擊軍寨遊擊右軍寨並建養濟院安懷院東北隅舊戎司左軍寨今為益都新軍營又舊遊擊鋪營處鋪兵今隸事司是其地今龍灣軍營即舊遊擊末軍寨地舊御教場今為教場餘並為民居園

地

尺籍

建康府廂禁軍隸安撫司四千人親兵一千人駐劄御
前諸軍隸都統制司兵五萬人馬五千八十七匹侍衛
馬軍移屯建康府以三萬人騎為額沿江制置司增置

軍額防江軍三千三百人內步軍三千人

勝捷五百人
吐渾一千人

雄威一千
五百人

馬軍三百人効用軍一千四百五十五人破

敵軍一千四十四人精銳軍二千五百三十一人親兵

左右部共一千人策勝中右兩軍一萬人制効兩軍二千三百二十六人靖安唐灣水軍五千七百二人龍灣遊擊水軍二千九人金山團窩制効軍六百五十九人遊擊軍五軍共一萬二千四百一十二人雄武軍五百八十七人義士軍一千八百七十三人寧江新軍六千二百八十人又有良家子新招帳前將官等兵至元十二年歸附之際軍民潰散徐王榮所領投拜者悉名新附軍分差各處與漢軍相叅鎮守故畧著其額云

軍器

景定志云除戎器戒不虞傳於易礪鋒刃鍛戈矛誓於
書修車馬備器械序於詩有備無患其來尚矣漢帝使
人視吳漢何為方修戰攻具乃有隱若一敵國之歎祖
逖用二千人起冶鑄兵固知其有誓清中原之志李德
裕請甲人於安定弓人於河東弩人於剡西於是兵器
皆犀利而蕃詔不敢窺焉修政安邊茲非急務乎本朝
建間金陵藩屏畿甸兵甲四出則北援淮東備海南控

荆楚西助巴峽開慶景定間凡甲冑戈劍弓矢之需取具於昇者無慮數十萬計取之不竭備有素也至元乙亥沿江制置趙潛聞兵至取行宮公帑金帛宵遁而所積器械資儲悉歸行省

戰艦

李綱嘗奏宋高宗曰臣聞生於陵者安於陵生於水者安於水南方之人習水而善沒其操舟若神而北人有懼舟楫而不敢登者習與性成也騎兵施於南方非所

便而南人教之水戰必可取勝昔曹操以數十萬衆順流襲吳周瑜以三萬人逆戰于赤壁因風縱火焚其船棹遂大破之操自此不敢有窺江表之心而鼎足之勢立其後曹丕復以大兵次廣陵觀長江風濤洶湧吳人戈甲旌旗之盛恐懼而退晉有江左苻堅以百萬之衆次淝水而謝玄以八千人破之衆皆奔北聞風聲鶴唳皆以為王師將至則東南之兵養育訓練因地利而用之亦足以自守其地應沿河沿淮沿江帥府要郡凡臨

流去處宜倣古制以造戰船上設樓櫓可以施弓弩下
運艖棹可以破風濤頒法式以授之仍募習水者為水
軍以時教閱激賞敵舟濟渡會合掩擊以我之素習擊
彼之躑濟其勢必勝得一勝則敵心破膽不敢有窺東
南之心矣嘉祐中范仲淹上言乞於河陽置戰艦水軍
以防契丹當時以為迂濶不果行使用其說初設至今
則大河有備靖康初金人豈能遽濟渡哉先事而言則
近乎迂事至而後圖之則無所及其實今日之急務也

所有諸路合置戰船募水軍欲乞專差官前去措置建康府制置司累政修造戰船自淳祐九年以後大畧可攷造船修船共三千五百隻詳見前志

本朝兵戍大畧

至元十二年中書左丞相淮安惠武王巴延總襄陽兵南伐用宋將呂文煥程鵬飛范文虎等為鄉導敗賈似道兵于丁家洲池州守將以城降沿江制置趙潛弃建康宵遁馬步軍副總管權制置司徐王榮及翁都統等

帥軍民於太平州納款二月十二日大兵至南城外雨
華臺下寨廿七日丞相平章呂叅政等官入城於府治
玉麟堂開省調兵大犒軍士立建康宣撫司招安江東
諸路以萬戶廉希愿招討索多兼宣撫使三月三日遣
黃頭先鋒哨馬數百人至句容瓜渚殺知縣葛秉縣民
巫及元率衆詣軍前納款授本處總管同二李百戶偕
往招安三月十八日立寨文孝廟禁止剽掠來降者各
授總把俾領其衆漂水漂陽二縣以次降附是夏以暑

熱駐師建康設江寧上元二縣尉秋七月丞相已延入
觀上都以上萬戶追封曹南王阿嚶罕權行省事平章
河南王阿珠萬戶追封汝南王張弘範等屯兵瓜洲宋
將姜才張世傑孫虎臣水陸逆戰相繼敗績行樞密院
駐劄鎮江宋轉運判官趙淮起兵溧陽宜興縣界屯據
長塘湖山山一帶阻水拒守冬十月右丞相至自京師
留左丞相阿珠右丞張惠等行省瓜洲斷淮東援兵自
與阿嚶罕叅政董叅政分兵三道水陸並趣臨安十一

月叅政右師破東垣寨拔溧陽建平廣德四安長興諸縣闕獨松關遣千戶竒塔特總管徐王榮等破趙淮屯兵十二月大兵破常州進次臨安之長安鎮遣徐王榮詣瓜洲行省計稟差新野夾千戶陳翼於建康宣撫司起新附軍五百漢軍二百招捕溧陽未下鄉寨十三年正月十一日徐王榮等敗宋兵執趙淮解赴瓜洲行省殺之徐王榮以功受驃騎衛上將軍蘇湖招討使帶已降虎符充建康路總管兼府尹十四年罷宣撫司為建康

路總管府立江東道宣慰司以叅政阿嚙罕保定萬戶
張弘範行宣慰使自是連歲出兵保定奕及福建奕廉
萬戶常州宋萬戶寧國喬萬戶泰州奕孟萬戶諸軍并
諸附軍相繼分鎮建康各縣置尉司專主巡捕在城錄
事司以判官兼凡路府州縣達魯噶齊皆兼提控捕盜
鋪兵止遞文書十五年張元帥追宋二王厓山江淮行
省發水陸師二萬從行十六年二月宋境悉平廉宋兩
萬戶軍移屯各處十八年調兵東征日本至元二十二

年江淮等處行樞密院開府建康元貞元年漂水漂陽

陞州設捕盜司以州判一員兼領各鎮寨俱設巡檢司

僉撥弓兵專以巡防捕盜凡一十二處

江寧鎮秣陵鎮竹蓐龍都茅山

下蜀東陽東垣高淳白馬橋舊縣山前

其州縣鎮守官軍則從萬戶府輪

差千戶百戶管軍分戍要害至元末年行樞密院例革

各萬戶府徑隸樞密院及江浙行省提調保定奕張副

樞軍馬移屯武昌益萬戶移屯泰州喬萬戶奕對遷寧

國大德元年益都新軍萬戶府自寧國路移鎮建康於

前宋遊擊軍營內置府達魯花赤萬戶副萬戶而下軍
官千戶百戶彈壓通設一百餘員所管蒙古漢軍新附
軍按月於有司支請鹽糧其漢軍本戶元僉免糧田四
頃歲以所出為封裝錢給當役者所在正軍專一守把
城池倉庫局院坊廊要害去處軍官不得多餘占使非
奉省院明文諸衙門不許差調集慶親隸行臺按治歲
時教習紀律嚴明龍灣有教習水軍萬戶府係行樞密
院於江北河南行省管下蘄黃鄧新揚高郵真滁杭州

等與萬戶府撥軍二千餘名前來屯戍專以教習隸萬戶府提調凡軍之新舊名籍船艦軍裝器備及軍器局逐年成造器械悉有額定工程名件此不詳著防戍地

境有圖見首卷

續報謬魯訥四處亳州寧國廣德江陰許浦通事馬軍軍器則歲造黑漆鐵甲

二百三十付真皮盔甲袋全四色水牛皮甲二百二十付紫真皮盔甲袋全羊肝漆明稍角弓五百五十五張手箭一萬八千隻箭葫蘆弓袋雜袋八十付其起解積貯本路具有文卷

至大金陵新志卷十

欽定四庫全書

至大金陵新志卷十一上

元 張鉉 撰

祠祀志 一

禮莫大於報本反始天地者生之本也先祖者類之本也鬼神者陰陽四時之本也故天子祭天地諸侯祭境內山川鄉大夫祭五祀庶人祀其祖尊卑鉅細各有等差而誠敬之道著焉傳曰我戰則克祭則受福又曰惟

聖人為能饗帝惟孝子為能事親言積其至誠之感而
氣之散者聚游者反精微之應非聖人孰能知之周衰
禮廢諸侯或僭郊祀而大夫旅泰山又其弊也淫祀興
而民德濫焉君子亦反經而已矣金陵故為都邑其以
王者禮樂祀天地山川之屬甚衆吳大帝赤烏十年始
為康居僧會建寺崇佛又為僊者葛玄立觀方山自是
代有增加梁陳於佛尤所重其三茅君蔣子文祀皆原
於漢吳蔣累號為帝而茅山之祠肇自隆古書缺莫得

而詳今其處傳多蕪廕

文帝命東海神埋
鼎泰漢常廕金壁

由晉迄宋死

事之臣及有功德於民皆特立祠最著者卞壺謝玄劉
仁贍曹彬楊邦乂姚興王珙我朝定江南淮安忠武王
巴延河南王阿珠曹南王阿嚙罕皆以功最受封淮安
立祠杭州河南祠汴梁而曹南王今立祠集慶禮所謂
崇德報功者邪因前志所紀輯錄歷代郊社佛道祠宇
以下具著之作祠祀志

古郊廟

南郊壇案建康實錄晉太興三年所築郭璞卜立之在

宮城南十餘里

注云在長樂橋東籬門外三里又吳大云今縣南有郊壇村即吳南郊地

帝初稱尊號武昌南郊祭用玄牡後自以偏方不郊太

元元年始祭南郊在秣陵縣南十餘里

吳志大帝時羣臣上奏宜修郊

社以承天意帝曰郊祀當於中土今非其所於何施此重奏曰普天之下莫非王土王者以天下為家若周文王都於鄴鎬非必中土帝不聽終吳之世郊祀廟社缺然無可紀者晉元帝渡江大興三

年始議郊祀立南郊於己地建武二年定郊兆於建鄴

之南

唐會要晉元建武二年定郊兆於建鄴之南去城七里一壇之上尊卑離位千五百神實錄云大興

三年作南郊在宮城南十五里郭璞卜立之圖經云在今縣東南八里長樂橋東籬門外三里其縣南郊壇村即吳南郊也
宋孝武大明三年遷郊兆於秣陵牛頭山西在

宮之千地廢帝復舊

廢帝以舊郊吉復初齊始屋員兆外常侍庾曇崇啓曰祭天尚質泰

從壇域無宮室者詔付外詳祠部李勣議周禮凡祭張旅幙張尸次宗廟旅幙今為棟宇郊祀既案宜制檐甍

梁武帝即位南郊為壇在國之陽常與北郊間歲普通

六年改作南北郊

隋志梁南郊壇高二丈七尺上徑十一丈下徑十八丈其外再壇四門運

歷圖云梁武帝中大通五年郊祀異香三至神光五色圓照滿壇陳武帝又修繕南郊圓壇高二丈二尺五寸廣十丈柴燎白天金陵故事云梁武帝時改作四周築土壇宮三重便殿一所兆域數里今其地在城東南與

婁湖相近

南唐郊壇即梁故處在長樂鄉去城十二里宋為

藏冰所

北郊壇按實錄在舊江寧縣東八里潮溝後東近青溪

晉元帝立南郊未立北郊明帝大寧三年始議立北郊

未及建而帝崩成帝咸康八年追述明帝前指於覆舟

山南立之制度一如南郊

宋書云江左未立北郊地祇衆神共在天郊成帝立二郊

天郊則六十二神五帝之佐日月五星二十八宿文昌

北斗三台司命軒轅后土太乙天乙太微勾陳北極雨

師雷電司空風伯老人六十二神也北郊則四十四神

五嶽四望四海四瀆五湖五帝之佐沂山嶽山白山霍

山鑿巫閭山蔣山松江會稽山錢塘江先農凡四十四神也江南諸小山蓋江左所立猶如漢京閭中山水皆有望秩也文帝元嘉十六年有事北郊復下其議於是八座奏省四望松江浙江五湖等座其鍾山白石既土地所在並留如故文帝立儒學館於北郊十二年嘗閱武於此宋孝武大明三年移北

郊於鍾山北原今鍾山定林寺山巔有平基二所闊數

十丈即其地

宋書云北郊晉成帝世始立本在覆舟山南宋太祖以其地為樂游苑後以其地為

北湖移於湖塘西北其地卑下泥濕又移於白石村東又以為湖乃移於鍾山北原道西與南郊相對後罷白石東湖北郊還舊處梁武帝北郊為方壇上方十丈下方十二丈

高一尺四面各有陛其外為壇再重陳北郊為壇高一

丈五尺

晉王恭反前將軍王珣入守北郊宋元嘉中每閱武於北郊徐嗣徽引齊兵為寇侯安都距齊

軍於北郊壇紹泰中齊蕭軌等渡江亦屯于北郊壇又按散福亭在縣東北鍾山鄉去城四里舊傳晉宋郊祀回鑾賜昨之所

禡壇石按通典江東太廟門北有石文如竹葉小屋覆

之宋文帝元嘉中修廟所得陸澄以為晉孝武時郊禡

石然則江左亦有此禮矣或曰百姓祀其傍或謂之落

星石

今在城隍廟內

明堂在城東南七里不詳其處宋書晉元帝受命中興

依漢故事宜享明堂宗祀之禮江左不立明堂故闕焉
大明五年有司奏國學之南地實丙巳爽塏平暢足以
營造其墻宇規範宜擬則太廟惟十有二間以應期數
但作大殿屋彫畫而已無古三十六戶七十二牖之制
是年五月新作明堂丙巳之地宮苑記云在博士省南
博士省在國學南
國學在太廟南梁武帝天監十二年詔以明堂地居
卑濕可量就埤起以盡忱敬陳亡焚毀皆盡將作監大
匠宇文愷量臺趾丈尺寫樣奏聞

今按宋齊梁陳各有
制作梁嘗毀宋太極

殿以材
構焉

晉太廟舊址在秦淮西晉大元十六年二月庚申改築
太廟秋九月新廟成案地志太廟中宗置郭璞遷定在
今處帝常嫌廟東迫淮水西逼路至此年因修築欲依
洛陽改入宣陽門內尚書僕射王珣奉以為龜筮弗違
帝從之於舊地不移更開牆禪東西四十丈南北九十
丈宋以後仍之至陳乃廢

社稷
附諸壇

府社壇舊在城西南江寧縣社壇同處慶元元年留守
張杓移置下水門內秦淮南歸附後遷置南郊城南門
外越城之後卜地十畝有奇週築垣牆內按方地設社
稷風雷雨師壇及官廳廨宇以時祭祀

上元縣社壇舊在白下門外尉司東

江寧縣社壇舊在縣西南府社壇東

繡春園
之西置

溧水州社壇舊在州西南二里

紹定四年知縣史彌鞏
移建於縣治西北望京

門之裏景定元年二月權縣事趙介如重修大德五年
移置州南築三壇至大四年知州盧朝請克治重修

句容縣社壇舊在子城北後移在青元觀西南

今養濟院基是

舊社大德間移於葛僊翁菴西後監邑尹閻敦武以其地卑隘置民地去舊壇西約百步設今壇

溧陽州社壇在州西南二里

金淵志在西門內

風伯雨師壇

附府社壇

祭龍壇舊在江寧縣西南陰山上

宋景德三年置

古太社稷壇晉元帝建武元年初立宗廟社稷在古都

城宣陽門外郭璞卜遷之左宗廟右社稷玄風觀在大

社西偏對太社御街東即太廟地社立三壇帝社太社

稷各一在唐江寧縣東

按宋書晉元帝建武元年依洛京二社二稷禮左宗廟右社稷

歷代因之洛京社稷在廟之右而江左亦然也吳時宮東開雩門疑吳社亦在宮東與廟同所也宋仍舊無所改作實故常二社一稷初太康中詔併二社之祀傅咸奏宜如舊詔一依魏制至元帝又依洛京二社一稷隋志梁社稷在太廟之西蓋晉元帝所創有太社帝社太稷凡三壇門牆並隨其方色在舊江寧縣東二里

雩壇按通典晉穆帝永和中

有議制雩壇於國南郊之傍依郊壇遠近注阮謏云在已地隋志天監九年有事

雩壇遂移於東郊在籍田域內

武帝以雨既陰類而求之正陽其謬已甚東方

既非盛陽而為主養之始則雩壇應在東方祈晴宜於南方今按雩禮本施於夏月武帝所言亦非確論也

籍田壇在城東十五里按隋志梁普通二年詔移籍田於建康北岸築兆域大小列種梨柏便殿及齋官省如南郊別有望耕壇在壇東帝耕畢登此以觀公卿之推

別有祈年殿梁書云普通二年徙籍田於東郊外

詔曰平秩

東作義不在南前代因襲有乘禮制可於震方間求沃野具茲千畝

大同五年又築雩壇

於籍田兆內

紹泰元年齊徐嗣徽復入至玄武湖陳武帝遣侯安都扼之戰於耕壇南即此地也

鍾山壇在鍾山南巖上苻堅大軍至壽春晉武禱於壇神曰當助攻堅見八公山上草木盡為人形又聞風聲鶴

啖皆言王師至堅衆潰西走

今蔣山有壇基在講經臺下俗傳為李王拜郊所疑

即此壇也

祠廟

城隍廟唐天祐二年置舊在城西北今在臺治南御街

東太廟街內

歸附後郡民重加修建

東嶽廟在城內西南斗門橋之東

宋雍熙二年置紹興十一年重建今至正

癸未郡民宋通甫等重修

江瀆佑德廟在城西清涼寺東

真武廟在府城西北清化市東

宋太平興國二年置建炎四年金人燒建康應

官舍民居寺觀神祠

無不蕩盡此廟獨存

後湖真武廟本吳赤烏玄武觀後燬於兵

蔣帝廟在蔣山之西北去城一十二里神蔣姓名子文

漢末尉繚陵死而靈異吳大帝為立廟

搜神記曰蔣子文廣陵人嗜酒

好色自謂已骨青死當為神漢末為繚陵尉逐盜至鍾山下賊擊傷額因解綬縛之有頃遂死吳先主之初其吏見子文於道乘白馬執白羽侍從如平生子文曰我當為此土神為吾立祠不爾使蟲入人耳為災吳主以為妖言後果有蟲入耳皆死醫巫不能治又云不祀我當有大火是歲數有火災吳主患之封為中都侯加印

綬立廟改鍾山為蔣山表其靈異次晉加相國之號蘇

弟子緒為長水校尉皆加印綬立廟峻之難鍾山神同蔣侯為助且曰蘇峻為逆當共誅鋤

之後果斬峻太元中苻堅入寇望見工師部陣齊整又

見八公山上草木皆類人形撫然有懼色初會稽王道子聞堅入寇以威儀鼓吹求助於鍾山神奉以相國之

號及至望見宋加相國大都督中外諸軍事封蔣王杜佑

若有助焉通典宋高帝永初二年普禁淫祀自蔣子文祠以下皆絕孝建初修復加蔣侯爵位至相國大都督中外諸軍

為蔣齊進號為帝乃以廟門為靈光門中門為興善門王

外殿曰帝山內殿曰神居齊元明中崔慧景之難迎神還臺求助事平乃進帝號

梁武嘗禱雨有異及魏軍圍鍾離復見陰助南唐諡曰

莊武帝更修廟宇宋開寶八年廟火雍熙四年即舊址
重建景祐二年陳執中增修得賜額惠烈政和八年漕
使劉會元重修乾道八年樞密洪遵重修

吳大帝廟在西門外清涼寺之西舊傳今廟即當時故
宮

晉元帝廟唐天祐二年置舊在城內西北下將軍廟側
宋景德四年重修後移就嘉瑞坊城隍廟東廡嘉定五
年黃度作新廟於石頭東西廡設禮樂羣英三十二像

葉適為記

褒忠廟在城南門外宋建炎三年立褒揚邦人之死節也詳見年表及本傳

旌忠廟在城南鐵索寺之東南宋紹興三十一年金人犯淮西御前統制姚興獨以一軍與戰于尉子橋鏖戰數十合援兵不至竟歿于陣將死猶手殺數十人樞密葉義問以聞贈觀察使命立廟賜額

忠節廟在城東三里與半山寺相望宋隆興元年江淮

都督張浚命李顯忠邵宏淵復宿州宏淵將王珙深入
賊營戮力鏖戰自辰至申手殺甚衆竟戰歿督府以聞
贈閬州觀察使命於寨前立廟賜額忠節

珙字伯謙德
第三子戰時

帥所部絳衣鐵
冠所向辟易

惠澤龍王廟在水西門裏大軍倉東政和中建

牛將軍廟在城西南隅竹街

宋末樊城死節勅
贈節使廟額忠烈

蜀三大神廟三神有德有功載在祀典

俗謂清源君梓
潼君白石君也

制使姚希得蜀人分間金陵日度地青

闕

之側鼎創祠

宇其旁又建道室為禔燎之所取管下洞神宮額以闕

國朝延祐年間改三大闕

成化祠加封梓潼帝君金陵廟廢不治泰定年間
盱江江廷楫住持宮事重加修建詳見後洞神宮下

曹南王祠堂建在正北隅柴街寶戒寺側
至正元年閏五月初六日

奉勅建中書省左丞許有士撰碑曰至正元年二月乙酉中書臣僚言勅建曹南王阿嚶罕祠禮部議視淮安忠武王而祠于集慶縣官給其費且請賜田千畝以奉祭祀制曰可既月王之子托歡由中書平章政事拜御史大夫行臺江南臺治集慶又得躬相厥役以迄于成貽書有士曰子嘗承詔銘先王知先王莫子若祠落矣

願紀也議不可乃本其碑擷其家世履歷勲庸之槩曰
蒙古札拉爾氏有贈定威佐運功臣金紫光祿大夫司
徒謚忠定諱博綽者王祖也贈宣忠靖遠佐運功臣金
紫光祿大夫中書右丞相謚桓毅諱伊呼者王考也
勲皆上柱國爵皆曹南王身皆死所戰有大功祖妣達
巴妣默呼皆封王夫人此其家世王武毅善戰襲桓毅
職中統四年賜銀章虎節仍食萬戶至元十二年擢昭毅
上將軍以上萬戶權行中書事進中奉大夫行中書省叅
知政事明年以叅知政事行江東宣慰事明年入覲陞
資善大夫行中書省左丞十六年進資政大夫行中書
省右丞仍宣慰江東十八年入覲拜中書左丞相行中
書省事階光祿大夫征日本次明州而薨壽四十九葬
曹州濟陰南村特贈推誠宣力定遠佐運功臣太師開
府儀同三司關國追封曹南王謚忠宣此其履歷
歲辛未渡江破宋師于龍興北山中統初討阿勒達爾
琿塔哈于河西明年扈征額呼布格于幕北明年從宗

王平李瓊于濟南四役皆有奇功賜黃金金籠金鞍文
錦恩數稠疊至元四年觀兵襄陽明年國之越六年克
之始走宋師南門堡獻溫舟之榮渡沙蕪取鄂州沂江陵
至鎮江十二年與右丞相淮安忠武王巴延分道取宋
王發建康與宋師戰屢敗之破東垣砦拔溧陽建平廣
德四安長興獨松關前後斬首一萬五千級殺其將
杜總管吳奉使許吳二總制及騎將二人俘谷總制張
知府裨將祝亮等四十二人十三年三軍會于抗宋亡
徇浙東降趙提刑等五百餘人追捕福安僵尸四十里
殺步帥李世達俘秀王與擇監軍趙由愾防禦使林德
降安撫使王吉分軍興化擒宋相陳文龍降宋官二百
餘人淮兵三千人江南遂平此其勲庸配托多庫庫楞呼
圖克岱並封王夫人子男二長伊蘇岱爾銀青榮祿大夫
山東河壯蒙古軍大都督集賢大學士次大夫也女五
俱適望族有士惟古者功臣受封之國先建宗廟於路
寢之東所以廣孝而勸忠也諸侯之制二昭二穆與太

祖之廟而五太祖百世不遷昭穆則侯親盡而遞遷之
自漢以來諸侯鮮及十世身享崇爵而子孫不能保也
廟制由是弗講矣其有德及生民功施社稷者在朝廷
則有圖形以寓其思賢念功之意在其臣吏則有建祠
以盡其事亡如存之心亦因時制宜之義也諸葛武侯
之沒也所在求為立廟又請立之成都後主皆不聽民
致私祭陌上以武侯之功尚何靳於一廟豈欲黜私祭
以崇正禮邪夫所在立廟在禮若汎立之成都亦復不
聽何哉至習隆向克之請始聽立廟沔陽則武侯之
得廟亦憂憂乎其難哉皇上於忠宣既立之祠又錫之
田思賢念切之盛德豈區區蜀禪之所知哉大夫祗順
德意克篤前徽勸孝勸忠於是乎在皆可歌以薦者也
乃為之詩俾歌以祀焉其辭曰乾元統天乘六龍宏才
碩德如雲從忠宣天挺間世雄父葛子播昏作農帝曰
來汝汝世忠奮戈無往不奏功方城碩碩睽皇風分兵
犄角乘其塘沙燕飛渡星月濛順流震擊無遺鋒義旗

禮干超獨松趙孤叩壁吳山空萬邦玉帛四海同台司
兩瞻昭報崇虎符龍節行江東邊廬何物勞蒙衝魂升
海隅心九重楊顯有子能始終良榮典冊脩且隆袞旒
冕爲曹南封石頭城高江流淩新廟奕奕摩蒼穹圭田
千畝畝且鍾維縻維世紛糝種春榆釋蓀簋有饌醕醑
載裸牲特豐脩樂舞兮明祀容神來假兮福攸降象賢
濟美垂無窮詳見
前圖攷并年表

禹王廟在保寧坊磨盤街口

其地有溝名建業溝又封崇寺街亦有廟俗呼平水

大王

侯將軍廟

侯瑱與王琳戰於烈山下大捷土人以瑱功烈甚盛故名山曰烈祠之山

劉將軍廟上元縣治西有廟街北

相傳南唐劉仁贍廟也

五龍堂在城北古太一觀基近玄武湖今廢屬金陵鄉

去縣八里

南唐保大八年改舞雩祠十三年有玄元尊像乘一木流於江及岸上道流迎奉徐錯為

記

孚澤廟在玄武湖側去城西北一里

宋文帝時黑龍見湖側時人號黑龍

潭廟祀之紹興中禱雨輒應張燾以聞賜額

嘉惠廟在城東南二十五里

紹興元年賜額慶元志丞相沈該政和中作邑上元

禱雨應刻

詩于祠

靈澤夫人祠在長干寺後龍池側

事見曾文昭公曲阜集云

炳靈公廟新橋西南唐昇元中置

五代史後唐長興四年封威雄將軍至祥

符元年封炳靈公今廟中有化紙盆上鑄南唐年號衆
鑄入三郎君廟按搜神廣記神東嶽第三子又稱東嶽

郎三

武烈帝廟在永壽宮西

南唐書常州柴克宏帥師往救果仁

見夢於克宏曰吾以陰兵助爾及戰有黑牛二頭衝突
越兵克宏繼之大敗越人克宏奏封武烈帝今按果仁

事見唐書沈法興傳蓋隋末嘗保據常州本廟在常州
徐鉉集有武烈帝碑潤州志唐贈忠烈公有諸道行營

都招討判官顧雲銘搜神記神字子威宋宣和中加封
及賜額柴克宏為佐神封靈翊將軍慶元志廟在天慶

觀西廟堂後水一壁乃毗陵董羽畫世傳名筆今不存
不知其處畫壁亦罕傳句容志廟在東門內溧陽志忠

祐別廟在縣東門外陸子通重建延祐五年本州准
常州路牒勅加封武烈顯靈昭德仁惠孚佑真君

二判官廟在城西門裏鐵塔寺西南百餘步

事述云舊本延祚院

土地神唐會昌中寺廢景福二年神託夢里人復夜
見火光連天人潛窺見炬舊焚焚焉因就其地建廟

白石廟

宋宋書晉咸和三年蘇峻亂溫嶠等入伐立行
廟於白石告元帝元后曰逆臣峻傾覆社稷毀

棄三正汚辱海內臣亮等手刃戎行龔行天罰惟中宗
元皇帝肅宗明皇帝明穆皇后之靈降鑒有罪勦絕其
命剪此羣逆以安宗廟臣等雖殞首摧軀猶生之年謝
靈運撰征賦造白石之祠壇懃二凶之無君謂此其地

在白石
陂今廢

九州廟

按宋書明帝立九州廟於
雞籠山下大會羣神云

紫微廟在城東北九里蔣山西

宋明帝立祀王行帝廢墓猶存

興德王廟在蔣山蔣帝廟北去城十三里

唐末吳天祚三年神見先

主夢中因立廟廢墓猶存

助國王廟在城東北十八里

本觀山王廟南唐取鐵山下遂改助國大王廟廢

青溪姑廟在今府學東與上水間相近

案輿地志青溪岸側有神祠世

謂青溪姑南朝時有靈異舊傳隋平陳張麗華孔貴妃死於此今祠像有三婦人蓋青溪姑與二妃也慶元志

廟在今上水門東興苑曰青溪小姑是蔣侯第三妹南朝甚有靈驗嘗見形云又類說趙文韶任青溪月夜唱

烏栖飛忽有青衣至曰王家娘子傳語聞若歌聲有闕人者須臾女子至容色可憐文韶乃歌深契女心曰但

今有瓶何患無水取瑩篴鼓之令婢歌繁霜自解裙帶
縛瑩篴歌曰日暮風吹葉落依依丹心寸意愁緒自知
窮夕別去明日至青溪廟中女姑神像即夜見者荆公
詩已無溪姑祠何有江令宅今廟恐非故處案此本溪
神祠後人傳怪至闕今
城東隅三姑廟闕小廟

白馬廟慶元志在江寧縣隨車鄉秦淮南岸去城三十

里宋顧琛傳景平中顧琛為朝請還東日晚至山下
于時商旅數十船悲泊東岸側有一人朱衣介幘執

鞭屏諸船云顧吳郡部伍尋至應泊此岸於是諸船各
東西俄有一假裝至事力甚寡仍泊向處人問顧吳郡

早晚至船人答無顧吳郡又問何船曰顧朝請耳莫不
驚怪琛意竊知為善徵因誓之曰為吳郡當於此立廟

至是果為吳郡乃立廟於秦淮號曰白馬廟今按秦淮
東上元崇禮鄉地有廟與史方山下東岸合隨車地名

殷巷二廟隔秦淮
相望里人各祀之

張僕射廟在城西門外十里

事迹編云舊經唐天祐中有清河張司徒營建金陵

百姓懷而祠之今呼張僕射廟北去城四里南唐張懿公墓道在焉或云即僕射也名居詠字德之嘗為特進

太子太傅未見為司徒也

周江乘廟在攝山頂

相傳吳時人蓋賢令也

韓將軍廟在城西門

額大吳韓將軍廟唐末楊氏據吳其人必有功者

阿哈廟在雞行街殺猪巷

相傳金人南侵時有而不忍而救免者人記其名立阿哈大

王廟

大邑縣志

至大金陵新志

十六

新林姥廟

南史張敬兒於新林姥廟中為妾祈子自稱三公不詳其所

李氏女廟在三山

李氏名珣字溫叔都官外郎幼女也八歲能賦詩後通江夏王常同汎舟射

利江湖間婁徽為江州作清風亭記常方歎美珣曰未之盡也何不云好山綠水萬里有盡處清風明月千古無老時一日舉其文於徽徽卒用其言為破題不久常死珣溺舟三山磯下後三日尸忽出水中土人異之立廟

楚菩提王廟舊在攝山前今徙棲霞寺內

稽神錄攝山記皆云神即

楚靳尚以譏諱為蟒穴於山齊永明中有僧為授菩提戒立祠山下號菩提王事甚迂怪亦見江總棲霞寺碑云

蘇大將廟舊在上元金陵鄉張陣湖側按南史宋明帝即位四方逆命

與蘇侯神結為兄弟以祈福助事平與建安王休仁書曰此段殊得蘇兄神力加峻驃騎大將軍云

句容縣城隍廟

在縣治南

三茅真君廟

句容縣志大元真人內傳曰漢明帝永平六年詔勅郡縣修守丹陽句曲真人廟陶

隱居關比廟今猶存在山東平阿村中有女子姓尹為祝建山西諸村並各造廟大茅西為吳墟廟中茅後山

上為述墟廟今並不知處惟昇元觀名鶴廟在祠宇宮之上以茅君分理赤城每年十二月二日駕白鶴會於

此紹興戊寅春重建廟嚴肅工興丹光現舊基

張王廟在句容縣南鈴塘廟北有張墓數百畝紹興經

界時蠲賦禁民佃東有石柱前有陂池

相傳王飲馬于此又有廟後廢

寺及孝宅硯池舊縣官禱祈香爐移轉不已有碑記其事舊額忠祐靈濟廟信安盧襄書今廟額曰正順忠祐

靈濟昭烈行祠以顯跡
桐汭反以此為行祠

廣濟廟句容縣志天聖觀祔龍神祠貌前有龍池

昔陶隱居

遷雷平池小龍養於此歲遇旱禱雨府縣官迎請致醮每應詔興間賜額淳熙紹熙間勅西封敷澤廣應侯

文孝廟在句容東門內

昭明有宅茅山邑人祠焉

劉明府廟在句容東門內

晉劉超為邑宰有德政在民

沈史君廟乾道志在句容縣北下蜀鎮西北又有沈公

橋神即宋沈慶之也縣志曰昭靈侯廟有祝文畧曰淳熙六年六月既望從政郎張巖謹再拜寓文告于建

康戊山沈侯之廟曰惟侯武勇勁正生為忠義死禍福一方後其子侶書曰先公赴舉江東乞靈得卜尋登第

越十年而寓前文以私錢助飭祠宇又四十八年侶濫為宰遂書文于板以顯侯靈

達奚將軍廟乾道志在句容縣東門內縣志白羊門內

事見古迹
仁威壘注

盧大王廟在句容縣西北東陽鎮市東父老傳云盧綰也無碑刻可考

慶元志鎮江周孚嘗至祠下曰盧絳也考南唐史絳仕江南至昭武節度使城圍日頻立戰功及金陵城陷募驍勇敢死十餘人行收敗卒由宣歙長驅入福建循海聚兵以圖興復不果而敗忠於所事者也

射烏廟在射烏山下去句容縣北五十里

或傳為昇

靈濟張太尉等廟

句容縣志張太尉廟在東門內久廢有靈濟王廟在縣南十五里縣志作

靈濟廟龍光廟在縣東二十五里武烈帝廟見前茅司徒廟在茅山事見溧陽天王廟在縣城東角

溧水州城隍廣惠侯廟在州東百步蓋唐縣治基也

神即唐縣令白季康祈禱必應宋元符中邑民俞瑒率衆建廟紹興九年李朝正請于朝賜額正顯十七年封廣惠侯淳熙元年修王端朝作廟碑十六年加封孚應寶慶元年加封順濟二夫人加封四字開慶中加封顯佑二夫人加封六字景定元年權縣趙介如以唐中書令敏中侯之子尚書居易侯從子也闕西廡立祠曰有唐文獻之祠五年封顯德公夫人河東薛氏高陽敬氏皆加封子三人皆特封侯居易特封昭文侯咸淳四年

邑人建顯應閣樂天集有侯墓誌銘曰公諱季康太原人秦武安君起之裔胄北齊五兵尚書建之五代孫也
曾祖諱士通皇朝利州都督祖諱志善尚醫奉御父諱
麟揚州錄事叅軍公錄事次子歷華州下邳尉懷州河
內丞徐州彭城令江州尋陽令宿州虹縣令宣州溧水
令歿于官舍明年某月某日歸葬于華州下邳縣某鄉
某原享年若干嗚呼公為人溫恭信厚為官貞白嚴重
友于弟兄慈于子姪鄉黨推其行交游讓其才自尉下
邳至宰溧水皆以廉潔通濟見知於郡守流譽於朋僚
才不偶時道屈於位而徒勞於州縣竟不致于青雲命
矣夫哀哉公前夫人薛氏先公若干年而歿生二子一
女女號鑒虛未葬出家長子某杭州於潛尉次子某睦
州遂安尉後夫人高陽敬氏父諱某某官生一子二女
女皆早歿子曰敏中進士出身前試大理評事歷河東
鄭滑邠寧三府掌記夫人在室以孝敬奉親為淑女既
嫁以柔和從夫為順婦及王家以慈正訓子為賢母故

敏中遵其教飭其自昇名甲科歷聘公府以文行稱於衆以祿養榮於親雖自有兼材然亦由夫人誨導之所致也夫人以太和七年正月寢疾終于下邳別墅享年若干明年某月某日啓溧水府君薛夫人宅兆而合祔焉禮也時諸子盡歿獨敏中號泣襄事託從祖兄居易誌于墓石銘曰緊我叔父溧水府君治本於家事施政于縣民繫我叔母高陽夫人德修於室家慶積於閨門訓著趨庭善彰卜鄰故其嗣子孫有今聞於

楚平王廟在溧水州南十里即平王都舊址也

乾道志吳越春

秋云楚平王都固城者周成王封熊繹子男之田於荆蠻之地靈王立與敵日尋干戈邊鄙不寧時吳軍失利乃陷賴渚至平王用佞臣之言殺太傅伍奢并其子尚子胥奔吳吳用之破楚而入郢其廟唐廣明元年重修知縣周邦彥詩姦臣亂國紀伍奢思結纓殺賢恐遺種巢卵同時傾健雛脫自去口血流吳庭達士見幾微楚

郊憂苦兵十年軍入郢勢如波捲萍賢亡國嬰難王死
屍受刑將隳七世廟先壞百里城子胥雖捐江素車駕
長鯨驚濤寄怒餘遺廟羅千楹王祠何其微破屋風冷
冷蟄蟲陷香案飢鼠懸燈檠淫俗敬魑魅何人顧威靈
臣冤不讎王況乃鋤丘塋
報應若不直吾將問冥冥

左伯挑羊角哀廟去漂水州七十五里

今廟中像羊左居左右介子推

位其中未詳又近地有子推墓地名介墟恐後人併其廟為一爾舊志廟在漆橋路東五里又有地名介墟在近後人因敬羊左義烈并塑子推像祀之然土人但稱羊左廟

荆將軍廟去漂水州南四十五里孔鎮南大路西高陂

古城內

舊經云荆軻祠未詳蓋以羊左事見爾

聖母廟在漂水州東十四里

蓋中山神俗號俞母俞丑救切南唐昇元六年邑宰

廢淫祀惟此廟獨如修建秘書省正字賈彬作記石刻已亡耆老能倍記元豐元年春旱禱雨而應邑人胡無競重刻石畧曰有唐中興父軌未一天子宵旰于燕人疇茲賢才以理郡邑詔琅邪王公出宰畿甸公每鄙衆心尚崇淫祀下有取舍那分否臧爰採地圖稽之故事古之諸侯今之令長得祀境內以祈有年有若聖母享于是山其名中山其神后土將設廟貌胡為不然其餘囂淳所完土木之設並從毀拆無或興妖有以見公之去邪義疑為政以德愷悌君子其在茲乎將仕郎試秘書省校書郎韋真矩書

張將軍廟在漂水州東南二十五里

俗呼烏龍廟禱祀輒隱民敬事之州

志事迹昔民有女行田野間感黑龍而孕後產鯉魚遂投水中復變化隨母所遊後乘雲去每春時必至墓上

禱雨暘
隨應

劉府君廟在漂水州北三十五里方墟

淳祐十六年太學進士杜子源

記曰漂水縣北之拓塘劉府君有祠舊矣禴禘禘禘祈輒響答端平丙申里民以棟橈將壓補其敝且藻飾之一夕繪工有醉醺嫚褻者傍觀為髮立汗下詰旦起視則堆經而死尉陶君季治被縣振驗視為廟素以靈著而今以是汙為弗靈矣遽火之已而風簾月牖變詭幻怪幾不容以一息安於是翻然悔鼻規復其初鄉之著姓僕君智明首以義倡時嘉熙己亥秋八月也未幾戎馬突至居靡遑寧其後因之水旱田萊多荒不漬于成淳祐甲申乃始屬役彈力竭慮若已作室雪脊朱扉林薄映照揣高度廣視舊有加位置貌象舉以法故洋洋如在民益敬憚其子桂發求予記稽諸志乘及裴晉公所著隧碑府君歸葬于鄉今州北三十五里曰劉墓者是

也其門人韋乾度闕良士鄭郡合十餘人琢石為碑頌
魯公叙送伯氏西遊亦侈其鄂不移華之盛晉魯二公
元勳盛德日星儼明千載聞風者衽歛色悚而於府君
稱道如是嗚呼金陵古帝王州達官顯人累累丘隴鮮
有氏其地者屋而祠之尸而祝之歷百千歲如一日府
君之德如此而書汗簡者獨甚約幸託晉公之筆以傳
而又幸缺裂敲礪之餘淪墜割亨之所非有賢大夫
如戴公挈而出之則其名行泯沒蒼烟衰草間然則決
斷刻於垢汙新廢祠於煨燼其好古樂善有神風化一
也裴度撰神道碑公諱太真字仲適族彭城晉永嘉末
衣冠南渡遂為金
陵人詳見本州志

溧水州諸行祠

東嶽祠在州治東張真君祠在
臨淮門外五顯祠在永安門內

溧陽州城隍廟在州東南挹秀門內

顯惠廟在溧陽州北二十里山山下

後漢司空驃騎將軍溧陽侯史崇廟

祈禱屢應大觀元年賜額政和二年封靈濟公舊經以爲溧陽史氏之祖故又號史祖廟廟有禱雨靈應記南唐昇元三年知鎮縣事郭延沼立案唐制方鎮兵戍州縣者謂之鎮兵將曰鎮將知鎮縣事者蓋以縣令兼將鎮兵如今郡守知軍州事也

貞義女廟在溧陽州西北四十里瀨水上

唐李白作碑淳熙五年重

刻碑云溧陽黃上里史氏之女即以飯食伍子胥自投於水者

趙城明王廟在溧陽州趙城內

明王蓋城之土地神州志廟有記唐中和二年

鄉貢進士林雲撰神諱禹獨立漢庭秉持邦憲闢東江南飢民爲盜王整師掃蕩吳楚晏清再分茅土分王東

平今州有趙城即當時屯軍之地後人思之立祠大歷中義興縣豪民張度聚衆毆竊至趙城東二十餘里驚風駭浪人溺舟沉乃茲神力水旱禱祝尅日應期今大漢書趙禹卽人也為丞相史稱廉平選為御史至中大姓歷中尉少府廷尉後以壽卒于家其事不合禹以異姓封王史必不畧詳雲碑意似指漢宗室為王者然不可攷矣

梁城廟在溧陽州古梁城內

相傳昔梁王國於此

赤鄒將軍廟在溧陽州東北二里屠塘右

舊經云城樂鄉侯史崇之

將也

武程將軍廟在溧陽州青安門外

高鄭二王廟在溧陽州北街廢

伍相廟在溧陽州護牙山下

聖姥廟在溧陽州曹姥山下

潘真君廟在溧陽州三鶴山下

寰宇記云潘氏兄弟三人得道化白鶴衝天後

人思而立廟祈雨有應

白鶴廟在溧陽州朝山下

按茅山昇玄觀有白鶴廟寺州志舊經云昔仙人釣魚於

此雙鶴來朝集廟屋上因名石上有仙人迹

東嶽茅司徒等廟

案舊志東嶽廟廣惠張王廟五通廟並在溧陽州西門內忠祐廟見

城內武烈帝廟茅司徒廟事迹云稽神錄浙西僧德林少時遊舒州路見一夫荷鋤治方丈之地左右數十里不見居人問之對曰頃時自舒之桐城至此暴得疔疾不能去因臥草中及稍醒已昏矣四望無人惟虎豹吼叫自分必死俄有一人部從如大將至此下馬良久召二卒曰善守此人明日送到桐城縣下遂上馬去倏忽不見惟二卒在焉某即強起問之荅曰此茅將軍也常夜出獵虎憂汝被傷故使護汝更欲問即荅曰已出矣不復見其二人即起而行意甚輕健至桐城頃之疾愈以所見之處立祠祀之德林止舒州十年及回則村落皆立茅將軍廟今俗呼茅司徒在漂陽州東門外一里舊志同

祠山真君廟在漂陽州招遠坊

五顯華光樓在府城西隅賞心亭側

神蓋五行之精古有五祀道書謂之

靈觀大帝祠廟所在有之江東尤盛若
木石之怪為妖則亦五行之沴氣耳

宮觀

大元興永壽宮即舊天慶觀在城西門內崇道橋北南
宋廢國學置總明觀地即吳冶城晉西州故址總明觀
廢道家者流以儒觀之名為道士觀揚吳於其地建紫
極宮徐鉉作記云冶城峻址西州舊宇卞真公之遺壠
郭文舉之故臺宋大中祥符間改為祥符宮續改天慶
觀建炎兵火紹興十七年重建舊太乙殿基即郭文舉

讀書臺也在聖祖殿後治城樓忠孝亭在觀之右歸附
初治城樓廢燬別建治亭元貞間改額玄妙觀天厯潛
邸屢幸之觀主趙嗣祺陳寶琳應對稱旨尋陞觀為大
元興永壽宮改治亭為飛龍亭賜嗣祺號曰虛一先生
寶琳曰虛白先生令有司新其宮宇出南行臺贖罰鈔
以供用費皇上即位之明年又撥鈔二千定成其功遣
匠作臣造天神像累賜金襴寶香嚴其祠事至元二年
降璽書命主其宮者甲乙次第之

翰林學士虞集記飛
龍亭畧曰昔在潛邸

東南海嶽湖江之上車轍馬足有所至焉則守吏民庶
興感榮華幸隨而表之以識其愛慕之意既登大寶自
天光日華之所被及山川草木與有榮耀則必有所述
以示乎天下後世若集慶路大元興永壽宮之飛龍亭
其一也亭成久矣而宮之住持道士賜號虛白先生臣
陳寶琳始錄其事即臨川山中求臣集記之亭本冶亭
宮本玄妙觀集慶本建康路皆所賜名也方在金陵時
行邸去治亭為近上時遊馬一日傳命且至臣寶琳出
宮門迎候適時從官已奉供具及門則知已至治亭久
矣引鍾山之形勝俯城郭之佳麗顧瞻徘徊悠然有化
育之洽焉從臣以寶琳見上笑曰道人何避客之久也
寶琳頓首俯伏請罪上曰山徑幽雅取便而至宜爾之
不知題治城者虞集今何在也皆對曰今在翰林充學
士命王僧家奴模而觀之因藏諸篋問寶琳何以字玉
林也則對曰道士燒金石為丹須抽鼎中狀如瓊林玉
樹故取以為名上曰當雪時吾登此亭目力所及樹木

皆玉也豈不易知乎更謂之雪林後臨御別書雪林字
賜近臣趙伯寧而寶琳仍字玉林矣謂寶琳曰吾出游
數勞人不如山行之便可作柴門嚴扃以待予之往
來自是數至寶琳野人見上之樂而忘其微賤或持酒
引裾欣然為留亦不責也天歷己巳寶琳與其宮之住
持趙嗣祺朝京師始製先生號以賜金陵道士之嘗得
見者嗣祺曰虛一先生寶琳曰虛白先生得之者纔二
三人耳蓋異數也時賜新宮名而治亭名飛龍矣明年
之三月二十五日臣集侍立奎章上顧謂曰汝猶憶治
亭乎亭旁松當加長茂臣集對曰臣集到治亭時未種
松也上曰游治亭見卿書以為繫千載之思實繫于懷
因命臣集書宮亭新名以賜而寶琳持歸賜南御史臺
錢若干新其宮所謂治亭者既名飛龍加飾楹桷置御
榻其中重覆而謹視之別作亭其下仍曰治亭羣臣公
卿大夫賦詠咸在又為亭以當鍾山之秀名之曰鍾英
宮成行臺御史大夫中丞以下及郡縣守吏咸集于此

以侈天子之賜矣嗟夫亭成至于今十有一年而先帝棄臣民將八年矣微臣辱在草野未先朝露詎能為寶琳執筆以述恩光之萬一哉於惟天子仁孝純至勛華相承羹牆之見無有遺思先帝神靈在天陟降上帝雖曰不可度思而日月所照霜露所隊顧懷下土於萬斯年臣民之瞻仰烏有窮已乎臣集故丕述事亭石以昭示於來者至元

五年十一月

記

自改飛龍亭後更作治亭及鍾英亭極

治城之勝云

洞神宮據景定諸志舊在蔣山太平興國寺東有古基階級存焉制使姚希得創蜀三神廟於青溪側景定四年就其旁創道宮以為祈報燎撫之所因以洞神舊額

加之命道士王道立為知宮呼洞神宮蜀人文復之為

記田產有碑歸附後久廢不治盱江道士江廷揖以泰

定初年住持宮事始修宮祠復其田土於舊溪光山色

亭基剏青溪堂李孝光撰記

建業東有老子之宮曰洞神在鍾山之下歲久而撓

宋景定間留守姚希得居守建業希得蜀人久宦不得

歸乃作蜀三神祠建業青溪渚中俗相傳言江總故宅

所在希得念諸祠祀今佛老子之徒守之乃得不廢遂

徙鍾山故宮並樹焉又大出金布為置次舍土田園池

芻蕘之地屬道士王道立守之事在文復之記祠語中

宋且亡土田散屬巨家祠亦弛弗治其徒夢神人告曰

後有公孫止吾宮則祠且復興延祐六年盱江廷揖

濟川寔來始至謁青溪上行視祠東西大為惕然於是

修三神之祠明年又益樹壤垣改作兩廡始完而御史
中丞納琳侍御輔之治書侍御史圖沁布哈監察御史
僧格達實過見之聞祠祀土田屬巨家使有司悉按故
籍歸其土田皆已復其舊濟川乃曰吾徒聚居以學道
道清淨而離世然不可以褻故有齊居之室乃作室祠
北曰青溪之堂堂成屬余記之客有問於余三神者皆
蜀人生有功於蜀沒廟食其縣何以得祀於他邦余曰
先王為祭法凡為民禦菑捍患而德在生人得著於典
祀夫三神有功於蜀而為蜀德然其法則可施於天下
世徧祠固宜今夫公卿大夫有民人之責苟能推上之
膏澤以利之則民甚至生祠之以報其仁至於他縣之
民亦願欲望見幾幸一臨蒞之以求得其所願此無他
以為能德已也繇是言之推民之所為事神可以少媿
卿大夫之不為民德者是故有功於人人思之矣獨事
神哉余感濟川之用勞若此故為言焉以慰問者之意
又為之詩樹祠之所始濟川江丞相之諸孫始仕矣不

遂去修老子氏之道別自號野舟云其詞曰肫肫神棲
自鍾陵徙青溪之崎江令之里三神並樹蜀人留守我
聞三神皆蜀篤生受命上天輔此衆萌鑿江灌田黍稷
如京惟孝廉氏帝使司文神光下燭其輝如星廟食蜀
都皆號神君徧祠于楚貴並公社民飲食神莫不懷
始隆中弛橈而復字字俄而作珍木具美疾猶鬼輸翠
其有頽藻升璿房仙聖至喜神鼇扶宮宛在中央若禪
海九環以大瀛美哉沈沈上與河通宮室清淨幽人所
棲澹泊無欲觀其天倪辭祝聖人與天地齊神有報民
則多祉福宜稼于田天倪大樂時神之休惟皇壽穀

報恩光孝觀在報恩坊街

觀基係陳朝進奏院故址宋
崇寧二年置觀賜崇寧為額

政和元年改為天寧萬壽觀紹興九年諸路天寧萬壽
觀並以報恩光孝為額專充追崇徽宗道場近年重加

修建

崇禧萬壽宮在茅山華陽洞南門之東即舊崇禧觀

唐史

方技傳道士王遠知少聰敏博綜羣書初入茅山師事
陶弘景傳其道法高祖之潛龍也遠知嘗傳符命太宗
平王世充與房玄齡微服以謁遠知曰方作太平天子願自得
非秦王乎太宗以實告遠知曰方作太平天子願自得
也太宗登極將重加祿位遠知固請歸山貞觀九年潤
州置太平觀以處之舊圖經云晉陶隱居創後為永嘉
館復為嘉遁館以待四方之衆即此也後號太平觀為
盜所焚南唐昇元初重建宋祥符元年因祈禱改名崇
禧觀建炎四年廢于火紹興中再葺陶弘景傳云大茅
中茅間有積金嶺先生於嶺西立華陽上下館舊記云
崇禧觀即梁貞白先生陶君華陽下館茅山記云太師
益國公以金帛建造觀宇粗脩先是真宗祈嗣茲山獲
應每歲建金籙道場七晝夜內降青詞朱表并降香施
料命句容縣宰充代拜官設醮于此由是總轄諸山此

觀為甲張商英撰碑銘
今延祐六年改為宮

王晨觀世人稱為茅山第一福地
高辛時展上公周時
郭真人巴陵侯漢時

杜廣平東晉楊真人許長史父子唐李玄靜南唐王貞
素並在此得道梁時陶隱居於此精修為朱陽館唐太

宗時為華陽觀玄宗時為紫陽觀宋大中
祥符元年九月改為王晨觀在雷平山北

古太平觀在茅山側
梁時陶隱居讀書萬餘卷善琴碁
為諸王侍讀永明十年挂衣冠神

武門居句曲山立館號華陽觀隱居宋
元符中改太平觀即前崇禧觀基也

崇壽觀在大茅山下華陽洞南
九錫碑云宋大始中廬
陵太守魯國孔嗣之為

道士華文賢建舊記云晉任闕人舊宅宋元嘉十一年
路太后建未詳孰是齊建元二年立崇玄館為太子當

臨之重廣基業唐天寶重修宋大中祥符七年賜今名張天興謨茅山志載在華陽洞南

下泊宮在中茅西

茅山志云大司命君以漢地卽三年自咸陽昇舉徑來句曲外立茅舍以

教二弟處也隱居云父老相傳是司命故宅唐貞觀十一年重立碑黃洞元父

元符萬寧宮在積金山

三茅記云嘉祐中有蜀人王畧於積金山結廬以煉丹藥後因

事捨去劉混康初入山居之宋哲宗召混康赴闕詔以所居為元符觀崇寧五年徽宗題其榜曰元符萬寧宮建炎四年為盜所焚楊沂中以私財建造殿堂

祠宇宮在中茅峯西垂

舊記云唐天寶七年勅於廟下立精舍度道士焚修七田負外

郎柳識
撰碑

華陽宮在積金山西

舊記云本貞白之上館唐天寶七年勅度道士焚修後燬於兵宋政

和中
重建

乾元觀在茅山大橫山下

陶隱居真誥定錄言大橫山下有泉昔李明於下合丹而

升玄洲梁天監十四年陶隱居瓶齋置齋室以追玄洲之蹤天寶中玄靜先生居之制肯建置殿堂臺榭甚多皆明皇賜額曰棲真堂會真亭候仙亭道德亭迎恩拜善等亭前朝大中祥符二年國師朱觀妙於此結廬老焉先賜集虛菴為額天聖三年九月改賜今額

天聖觀在茅山積金峯上

梁天監初陶弘景開創池沼唐貞觀中建立道靖至德中

賜名火浣宮唐末遂廢宋景德中張明真結廬於此祥符中御製觀龍歌送龍歸三茅山所得之池即此處也

天聖三年九月賜名延
真菴五年賜額為觀

五雲觀在華陽洞西門五雲峯下

宋天聖中王文穆公
欽若於此建菴景祐

四年賜額五雲觀慶歷二年晏元獻
公殊撰記後為雷所擊碎碑不再刻

抱元觀在茅山柳谷泉上

舊名柳谷菴政和八年因陳
希微修行於此勅賜抱元為

額慶元間王
元綱重建

昇元觀在中茅峯西

本名白鶴廟劉至孝三遇仙桃之
所宋元祐中道士湯友成友直居

之政和八年俞
鼎奏改今額

棲真觀在崇禧宮東

本名玉霄菴舊記云陶貞
白中館宋宣和中賜今額

華陽觀在宗壽觀西

舊名鴻禧院舊記云寶曆二年勅置即梁昭明太子舊宅丘徵君亦

隱於此李德裕延太玄周先生有碑宋治平中賜名鴻禧觀至宣和初改今額

清真觀在大羅源中

宋政和中吳德清始營建為道人棲泊之所徽宗朝賜以觀額紹興

間每歲三月十八日四方道人皆會於此齋時多有鶴至故謂之鶴會

金陵觀在句容縣

張允之建

元曜觀在句容縣

王道憐建

元陽觀在句容縣

張元始建

洞靈觀在句容縣

皇甫冉有詩

僊臺觀在句容縣

劉言史有詩

泰清觀在溧陽州東南州學左

淳熙十年道士王靈和移溧水州廢額建

太虛觀在溧陽州盤白山晉盤白真人得道之所簡文

帝詔真人宅造觀賜曰招僊宋大中祥符元年改今額

賜銅天尊像一真人像二觀有九井真人煉丹藏井中

觀西北有南唐隱士許堅放魚池東北有漢蔡伯喈讀書臺山頂有會仙亭墓有銅鍾唐大厯六年鑄有銘州

有廢永仙觀唐開元初宗先生法嗣建觀碑在今觀內乾道志鍾樓嘗歇側揚吳順義中一夕大風自正在州

西南三十五里有周潘行濟先生墓在觀之前

幽棲觀在溧陽州北三十五里有幽棲伯祠堂

州志紹興中尉

朱大廉記曰幽棲觀舊梁普通二年有隱士號幽棲伯鍊丹成全家白曰昇天其宅居道家流梁以其號名曰幽棲觀基延袤三十畝周圍有田有園廣半頃皆仙人之舊產舊有碑不存觀中有藏丹九井井泉甘美不減惠山觀東北有小阿號朝斗山山側有井云幽棲伯祭北斗器藏其中山之右有望僊橋當昇僊之際居人瞻仰而名也許堅題詩石刻尚存

黃山觀在溧陽州西南四十里黃山下

舊傳西晉時有黃鶴真人修道

飛昇唐天寶九年置觀州志宋屯田員外郎周絳少為道士一夕弃冠褐發憤讀書登太平興國八年第是歲及知常州日有書謝道友觀中藏之

崇德觀在溧陽州西南六十里唐長慶元年建本名陵

陽觀大中祥符元年改今額亦見溧水志

水環觀西北隅曰蘭溪溪

上有墩曰掛魚臺舊傳陵陽子明垂釣之所元和郡志曰陵陽山在宣州涇縣子明得僊處溧陽州舊亦隸宣

州云

靈寶觀在溧陽州西六十里芝山

舊傳梅福學僊之所唐咸通二年修太平

興國中重建州志案福傳居家以讀書養性為事元始中王莽顯政一朝弃妻子去傳以為僊後有見福於會稽者變名姓為吳市門卒豈嘗寓此乎元豐中封福壽春真人

聖祖觀在溧陽州西北六十里

唐咸通中建今廢中

紫虛觀在府城炳靈公廟街

至元十五年創御薩勒迪密實重修

毓真觀在青溪上

宋景定三年喬真人創名葆真菴至順三年集賢院定額

三茅冲虛菴在府城西門龍王廟側

茅山提點謝天祐建弟子謝日俞繼

守之天歷潛邸嘗游隣近道菴有所坐軒扁全清境界庚午歲併其菴基創龍翔寺命日俞別住此菴改額大

昇龍觀

西山道在冶城山之西麓黃泥菴內

宋嘉定中默應居士張守正者遇一

道人云來自西山授以驅蝗法有應守正結草菴以居嘉熙中其從子妙真因建為西山僊集道院祠許真君

云

全真菴在府城立德坊玄妙觀街忠烈廟西古城隍廟

東

宋咸淳中張志朴字希陽者連水人號木菴老有道行衆為創菴在西山道院南後其弟子移建是菴

靈寶院在茅山玉晨觀隱居昭真臺故基

唐宗師孫智清王栖霞重

建奉靈寶天尊像
內有老君瑞像殿

洞陽館在茅山南洞華陽觀之西

政和間延康殿學士
王漢之為高士沈子

舟建以
鍊大藥

西天寧院在句容元符莊宋宗寧五年賜額

玄洲精舍在茅山鶴臺澗上

至元間蔣宗師
立存鬱岡古名

華陽道院在積金山東

大德間王宗師建西偏有奇石翰林學士元明善撰碑

三茅道院

大德間元符道士姜大珪建

唐若山菴在茅山鄆干塘東

若山唐開元中嘗為潤州刺史葉官來山又居太湖

苞山今林屋有碑殘缺矣

却尊師菴在茅山八卦臺南數十步

尊師不知名及時代有甃垣石臼及

竈繞方丈餘在荆莽中宋紹興間築菴始見

齊雲菴在中茅小茅之西玉沙泉上

劉夢衣先生居

天信菴在茅山颺輪峯下

楊亶甲先生居

圓錫菴先在茅山大羅源後徙龍尾山前

宋紹興間毗陵道者虞慧

聰創慧聰蓬頭苦行日結草屨二兩以易米每夕拜斗一夕感黑虎伏其旁高宗知名召見德壽宮賜以齋米

對曰野人無用留作軍需上一笑放還山

棲白菴在丁公山

華文閣學士秦燦建元符知宮張洞元主之

凝神菴在茅山黑虎谷前小阿西

山最深舊有黑虎未嘗傷物宋高宗聞道

士張椿齡名召對德壽殿為書陰符清淨二經并賜菴額

悟真道院在府城內正西隅大木頭街

元係南唐燕翼二王祠宇宋淳

祐間改作道院奉西山真人

奉真菴在府城南隅文孝廟西

即秦淮
僊境

青溪道院在舊子城東偏其地古青溪所經

延祐元年
真定李允

建祠老子
而下僊者

四聖院在府城正北隅

至元六年道士
仇至清重建

朝真院在府城正東隅

至元十九年崔永和建
名朝真堂泰定間改額

中和菴在府城北隅

全真李清菴
苗實菴修建

上清院在府城正南隅

至元二十六年
道士潘雲窓建

上真菴在府城東南隅化門寨

宋端平
三年建

上真菴在府城東南隅堤岸

至元二十四年道人徐守一建

長春菴在府城正南隅炳靈公廟街

宋時建

道寧菴在府城東南隅旗望寨

延祐年間郡人宋運成建

逍遙菴在府城西北

地近古者闍寺全真子道邁所居能編修鼎臣為記

玉陽菴在府城西北隅

全真王道菴建

太清菴在江寧縣治西

宋鄭安撫住宅至元二十一年捨建道菴大德五年四月十四

日有道人求齊種栢枝石曰上尋失所在其石見存

元和道院在府城正南隅胭脂巷

至元二十四年楊道士建

香山菴在漂水州城隅廟東即舊崇真道院

延祐六年
王圭等建

石湖道院在漂水州儀鳳鄉

延祐四年
俞逢酉建

三山道院在漂水州上元鄉距城二十里

湯因
建

茅山南北有歸真迎真二館崇真院鶴臺常靜石堂超

萬松俱妙朝陽思真積金山玉泉雲谷集聖崇真奉真

靜真澄真喜客泉慶和上善守柔靈寶抱朴秀雲青龍

真興志和素華和福僊臺丹谷寧真翛然靖虛靖真通

泉太和致柔潛神善慶靜真妙法頤真如常靈泉回僊

洞陽通靈洪福玄德全真黃寧冲慶崇德玉虛九錫草
堂三華寧壽清靜老壽觀妙洞清木華悟真高靈圓慶
朝真隱深谷神抱陽和真仁和抱元集禧至聖養神潛
真正一拱極養素碧虛居靜濟陽朝元百丈體純玄真
扶虞凝雲寧靜明真闕常潛虛靜隱凝熙清虛柔和澄
神守一常應德善熙真洞僊養拙玄通德潤洞玄又朝
陽玉液見素朝斗迎真延真慶雲瑞雲各有二凡一百
二十四卷皆道者所建

舊例祠廟寺觀非祀典及賜額不書自歸附至今
建置頗多其地居或係前朝宮府遺蹟或係臺省
官僚經畫修建其題扁或經集賢宣政院定擬或
有館閣名臣題詠碑刻所奉祠者又皆祀典之神
名為祝釐報上前志及郡報具見之今不容悉刊
而不識也畧存之以備叅攷菴院倣此

至大金陵新志卷十一上

欽定四庫全書

至大金陵新志卷十一下

元 張鉉 撰

祠祀志 二

寺院

大龍翔集慶寺在城正北隅閃駕橋北

天歷元年勅建翰林侍講學士

虞集撰碑畧云上自金陵入正大統改元天

為集慶路達使傳旨行御史大夫阿爾斯蘭哈雅以金陵

宮之舊作大龍翔集慶寺云明年召中天生住持禪師

大新於杭州授太中大夫主寺事設官隸之畫宮為圖

授工部尚書王士弘往董其役斤廣其地為民居者悉
出金購之土木瓦石墜金碧之需財自內出不涉經營
工以傭給役弗違農有司率職庀功景從響應御史中
丞趙世安承稟於內行御史中丞易闕薰阿古爾哈雅
相繼率其屬以涖之是以吏敏於事而民若不知材既
具期以又明年正月六日壬午之吉廼建立焉其大殿
曰大覺之殿後殿曰五方調御之殿居僧以致其道者
曰禪宗海會之堂居其師以尊其道者曰傳法正宗之
堂師弟子之所瞻發辨證者曰雷音之堂法寶之儲曰
龍藏治食之處曰香積鼓鍾之宣金穀之委各有其所
繚以垣廡闕之三門而佛菩薩天人之像設纓蓋床座
嚴飾之具華燈音樂之奉與凡所宜有者皆致精備以
稱上意焉賜姑蘇腴田以飯其衆上在奎章閣親詔臣
集製文刻石以誌之臣聞金陵之虛自秦時望氣者嘗
言有天子氣至藏金土中以鎮之其後若吳晉宋齊梁
陳南唐之君長據以為都然皆瓜裂之餘僅克自保要

不足以當王氣之盛夫孰知江山盤踞之固天地藏閟
之久積千餘年而有待於我聖天子之興也不然何淵
潛之來處遂飛躍之自茲見諸禎祥行事昭著之若此
者乎夫太陽之昇麗於天光耀熙赫高深廣袤之區生
成動植之類孰不受其煦燠而其次舍之所經知天者
必仰推而志之天子以四海為家莫非聖明之所臨鑒
惟帝運之所由起天人應合之機實在於此其可忽諸
今上建極于中撫制萬國顧懷昔居勢隆望重非我佛
世尊無量之福孰足以處乎此也茲事之成上以承祖
宗之洪庥下以廣民庶之嘉惠聖天子之至仁大慈
垂示乎億萬斯年者以此可見矣於戲盛哉敢不拜手
稽首而述讚曰明明上天祚我皇國聖祖神宗立我民
極於昭武皇懋建丕績憲章修明民用齊飭天下為公
仁廟受冊治極而祀或敷彛則迺昧明哲是保是翼俾
久而安弗通以述祝融效靈海若率職更相吉土此惟
與宅吉土惟何建業舊邑龍依崇丘虎在盤石昔有居

者不稱厥德惟我聖皇天命攸迪川寧於波田宜於穡
民用孝敬神介景福帝命不遲師武臣力遂開明堂受
天之厯廟而祖饗郊而帝格治功告成庶物蕃息江流
湯湯經我南服中城有宮皇所肇迹惟時父老載慕疇
昔雲來日臨庶我心懌皇帝曰嘻予豈汝釋惟大覺尊
寶相金色常以慧慈拯汝迷溺我即我宮作祠奕奕照汝
淨土沐浴甘澤汝見大雄如我來即馬寶象寶珠宮金
壁凡為汝故我施無惜無菑無害居佛翼翼民庶稽首
誠所感有永無斁寺建後命行臺官提調撥鈔置闕
官主其賦入咸有成規
詳見圖表及官闕

大崇禧萬壽寺在寶公塔後

天厯元年勅建命中丞趙世延等記之畧云昔在我

世祖皇帝膺上天之景運承太祖之丕基混一海宇建
立制度條理綱紀一出府思以為子孫萬世之成法者

昭乎若天旋而日行也乃若崇尚佛教營治塔寺亦必
弘偉殊勝足以聳臣民之瞻焉歷數在躬天之所命孰
能違之若夫雄妙覺之尊默相潛佑者必有其徵矣
是以累聖相承率是而行之也潛邸在金陵時於暇日
登鍾山而觀之見其江山之紫迴樹藝之廣茂民庶之
熙洽慨然興歎以為我祖宗德澤之涵煦以至于斯也
問諸邦人父老則又以為昔有聖僧曰寶公者自梁以
來實委靈茲山能顯我國家之神庥以覆護吾民也水
旱疾疫凡有禱焉隨願輒應於是上感焉鍾山之陰有
石巖中虛下出流泉注入功德水乃即巖中作觀音大
士像巖前構水棧虛容瞻禮者既而又以為未足即珠
峯之北得高爽之福地規置大剎宮殿樓閣如自天降
寶公之塔在峯上正當其前來茲山者仰而望之如見
天宮於林壑之表然後上仁民愛物之心所以屬諸寶
公者衆庶莫不知之相與踴躍而讚歎矣鍾山之舊寺
聚銅數萬斤鑄大鍾金既在鏤上以碧珠投之及鍾成

碧珠不壞完好堅固宛在樂銑萬目驚覩以為寶公之
報貺焉天歷元年九月甲申臣世延臣集入見親詔之
曰宜加寶公號曰道林真覺慧感慈應普濟聖師寺曰
大崇禧萬壽寺汝世延等其勒文以記之臣世延等既
具述其事而竊思之曰帝王之興也天與之天保之百
靈受職符瑞交現此其常也金陵據東南之會山川鬼
神翼扶翕張於吾君者蓋凡五年而後歸正大統宜皇
心之注於斯乎於乎累朝佛宇之盛皆臨御時為民禱
崇資用功力有司具焉茲寺之成實在試難之日出私
財以具事而雄麗若此此固生民之所以深感乎淵衷
而寶公之所以顯著於禎符者也於乎休哉敢再拜稽
首而獻銘曰大江之南鍾山龍盤王氣潛鬱神所保完
於皇聖明遵養時晦靈祇奉天竦立以待春殷秋高來
遊來遊旆有交龍載雲在郊顧瞻原隰有稼有穡元元
之生聖聖之澤民亦望之帝子實來不鄙我邦庶無苦
哉維梁寶公去之千歲善福其民有引弗替皇運勃興

寶有慧知奔走先後克相厥時奕奕祠宮我營我作我報無私爾感無作吉金之良燥濕不移萬古在巖宣號震迷寶乃發祥以肅羣眎明珠不灼彰上之賜飛龍在天臨制九圍皇心襄四眷茲崇禧崇禧之宇永殿南服天子萬年錫我民福

帝師寺在保寧寺北

延祐七年建

保寧禪寺在城內飲虹橋南保寧坊內

吳大帝赤烏四年為西竺康僧

會建寺名建初晉宋有鳳翔集此山因建鳳凰臺於寺側宋更寺名曰祇園昇明二年齊太祖為比丘法願造寺於其地得外國輒為白塔又名白塔唐開元中寺僧大惠禪師者明皇召至長安尋求歸山詔可之因改其寺為長慶寺其額韓擇木書南唐保大中齊王景達為先王造寺因名奉先宋太平興國中賜額曰保寧祥符

六年增建經鍾樓觀音殿羅漢堂水陸堂東西方丈莊嚴盛麗安衆五伯又建靈光鳳凰凌虛三亭照映山谷圍甃塼墻五伯丈茂林脩竹松檜蓂蔚詔歲度五僧政和七年勅改神霄宮建炎元年勅復舊額三年四月駕幸江寧權以寺為行宮閏七月如浙西其後命即府治修為行宮而御坐猶在本寺歲久屋弊留守馬光祖重建殿宇及方丈觀音殿水陸堂厨堂庫院移鍾樓冠青龍首增建廊屋橫直一十八間作新建鳳凰臺記詳見鳳凰臺下

天禧寺即古長干寺在府城南門外宋天禧二年改今

額寺有阿育王舍利塔祥符中賜號聖感其晉高悝所

施金像隋文帝徙置長安

梁天監元年立大同元年幸長干寺阿育王塔出佛爪髮

舍利又幸寺設無遮會大赦丹陽記大長干寺道西有
張子布宅在淮水南對瓦官寺長干是秣陵縣東里巷
名江東謂山壠之間曰干建康南五里有山岡其間平
地庶民雜居有大長干小長干東長干並是地名小長
干在瓦官寺南巷西頭出大江梁初起長干寺按塔記
在秣陵縣東今天禧寺乃大長干也宋開寶中曹彬下
江南先登長干北望金陵即此地天禧二年改為天禧
寺政和六年建法堂李之儀端叔撰天禧寺新建法堂
記云天禧寺者乃長干道塲葬釋迦真身舍利祥符中
建塔賜號聖感舍利寶塔至天聖中又賜今額按梁書
大同三年高祖改造阿育王塔出舊塔下舍利及爪髮
髮青紺色衆僧以手伸之隨手長短放之則屈為羸形
始吳時有尼居其地為小精舍孫綝尋毀除之塔亦同
泯吳平後諸道人復於舊處建立焉中宗渡江更修飾
之至簡文咸安中使沙門安法師程造小塔未及成而
亡弟子僧顯繼而修之至孝武太元九年上金相輪及

承露其後西河離石縣有胡人劉薩何遇疾暴亡而心
下猶煖未敢便殯經七日更蘇說云有兩吏見錄至十
八地獄隨報重輕受諸苦毒見觀世音語云汝緣未盡
若得活可作沙門洛下齊城丹陽會稽並有阿育王塔
可往禮拜則不復地獄因此出家遊行禮塔次至丹陽
未知塔處乃登越城望見長千里有異氣色因就禮拜
果見阿育王塔所放光明由是定知有舍利乃集衆掘
之入一丈得三石碑中一碑有鐵函函中有銀函銀函
中有金函盛三舍利及爪髮各一枚長數尺即遷舍利
近北對簡文所造塔造一層塔十六年沙門僧尚加為
三層即高祖所開者也實錄咸和中丹陽尹高悝行至
張侯橋見浦中五色光長數尺乃令人於光處掘視之
得金像未有光趺乃下車載像還至長干巷首牛不肯
進乃令御人任牛所之牛徑牽車至寺悝因留像付寺
僧每至中夜常放光明又聞空中有金石響經一載捕
魚人張係世於海口忽見銅花趺浮出水上取送縣縣

以送臺乃施像足宛然合會簡文咸安元年交州合浦
人董宗之採珠沒水於底得佛光豔交州押送臺以施
像又合馬厓三十餘年光跌始具隋文帝徙入長安蘇
魏公頌長干寺詩注云晉時有沙門惠達至金陵長干
護古佛塔因於其地建佛刹即劉薩何也至南唐時廢
寺為營廬久之舍利數表見感應祥符中僧可政狀其
迹并感應舍利投進有詔復為寺即其表見之地建塔
賜號聖感舍利寶塔白塔在寺東即葬唐三藏大徧覺
玄奘大法師頂骨之所金陵僧可政端拱元年符二年知
安終南山紫閣寺俗呼為白塔事具塔記元符二年知
府事呂升卿請於朝改為十方住持楊次公長干聖感
塔詩云釋迦八萬四千塔一在江南古道場無礙展開
青髻髮最初分得白毫光陳軒金陵集載魏京登長干
塔詩云江南管當幸事畢盡憑廟算非臣專眷言此地
本軍壘元與招提安佛子蓋叙宋初事也至元二十五
年有詔選高行僧三十員開講于江南諸郡擇名利以

居之時景公德公講主首奉詔開席于金陵天禧寺說經訓徒傳慈恩之教未幾時賜號佛光大師并撥賜故宋太師秦申王墳寺旌忠寺為下院以其廢產共贍講席改賜元興天禧慈恩旌忠教寺額僧統廣福大師常施財繕修大塔泰定中潛龍時嘗數幸寺及登大統以所奉觀音像付寺供養歲給香燈之費至順初佛光之孫法嵩入覲上顧謂曰舍利塔曾修完不嵩曰未也即日賜白金三定及官錢伍阡緡以助繕修臺臣郡守咸致其力有旨令佛光之徒廣演主寺事賜號弘教大師塔完之日嘗感天花如雨祥光如練滿空者凡數日詳見中丞趙世延所撰碑

正覺禪寺一名鐵塔寺在城內西北治城後岡上

宋太始中

邦人捨地建精舍號延祚寺至唐有靈智禪師生無雙目號羅暎和尚經論文字悉能明了時人稱有天眼為

建塔於寺內廣明中賜額梁侯景之亂王僧辯入討景使其黨宋長貴宋延祚寺何遜有登延祚寺閣詩佛殿前有鐵塔二座鑄云乾興元年造古鍾亦唐時所鑄有經幢鵠大吳金陵府延祚院寺有井十一口內一口最大號為百丈泉井閣上字乃保大元年所鑄宋熙寧中賜寺名曰正覺塔名曰普照王荆公嘗於寺西作書院有軒名籜龍建炎三年以法堂西偏為元懿太子攢官今寺東偏復建延祚閣名公賦詠尤多炳靈公廟西及新亭側又別有正覺寺云

能仁寺在臺治東南

劉宋元嘉二年文帝為高祖建名報恩唐會昌中廢吳大和六年毗

陵郡人徐景運為其親重建曰報先院南唐昇元中改為興慈院至開寶中又廢後有里人捨宅復為興慈院太平興國二年邦人以院地卑濕徙置于此以乾明節日建院額後改為承天寺政和中又改今額景德志能

仁禪寺在南廂嘉瑞坊慶元間游九言佛殿記云寺南接秦淮數百步其地古青溪之濱也自宋始建至南唐改興慈無鵲識可攷獨據圖經所載然五代唐慈帝應順甲午為吳大和逆數會昌乙丑蓋已九十年既曰廢矣中間誰所繼續院之老僧僅能記本朝之言院故在西門雙廟之東至道中有圓覺律師德明者際遇太宗召見錫御容及羅漢像以歸咸平間重賜院基田產更律院為禪寺寵以詩章寺復顯至崇寧賜名承天政和七年改能仁今之寺其咸平所賜而遷也又曰圖志謂寺常廢於開寶中繼有捨宅為寺者邇人復以卑濕徙今地不知何據觀咸平制書則老僧相傳當為可信建炎三年室宇暨朝廷所賜復燬猶賴制書無恙以詔後自是草創數十年無振起者淳熙丁酉余客金陵偶至寺殘僧蕭然敗壁風雨莫蔽門臨街喧卑過者陋焉適主僧允微初嗣法席布衣芒屨徒步通衢畧無外飾氣貌淳夷語言動止心固重其為人後十八年余來為帥

屬則大門易東嚮堂廡壁甃盡撤其舊僧徒彬彬而微
則老矣然其布衣芒屨如故戶庭雖華而居室甚陋齋
庖潔豐而自食至菲金陵城中多鉅刹同時主者有
澤車衣有織縞而臺殿歌斜藉口檀施漠不顧恤微顏
然自勵曾無緼袍狐貉之慚慶元丁巳鼎建大殿微言
曰能仁非他方比國朝忌日府臺率屬文武駿奔炷蕓
冠蓋填溢今老釋之宮咸曰焚修為國也而廢頽若是
何所掌乎願記其事併錄院之始末毋若向之夫傳戚
氏云今寺南唐古寺基保大年中昇州特進守司徒致
仕鍾山公李建勲捨田入寺後廢宋朝撥賜地基起興
慈禪院咸平初建勲文潤州本起寺住持臨壇精律大
德尼進暉申明乞以故父李相公舊所施田入興慈寺
至今供常住咸平後改承天寺崇寧間又改入下承天
為能仁寺真宗賜昇州法主圓覺大師賜紫德明詩曰
精勤演律達真風釋子南禪道少同興旨筌蹄悟佛理
慧燈廣布九圓中真蹟今仍藏寺中至元之五年住持

僧真實既新其寺又作鍾山公祠以寺之土田多公所施也臨川危素請記於集賢揭公儼斯畧云五代之際君不君臣不臣可謂天下大亂之時而公所與為僚友者有若馮延巳其人史雖稱公有吏材薰蕕不相禱永炭不相入豈能行其所志哉宜乎引身山水之間謝病不出死而囑其家人以薄葬公命之危於天勢之危於人有可悲者矣建勲事見年表

太平興國禪寺在蔣山去府城十五里

梁武帝天監十三年以定林寺

前岡獨龍阜葬誌公永定公主以湯沐之資造浮圖五級於其上十四年即塔前建開善寺即今寺基唐乾符中改為寶公院南唐昇元中徐德裕重修後主又改為開善道場至太平興國五年改賜今額慶歷二年葉清臣奏為十方禪院紹興三十二年加封寶公號塔以感順為額今塔院西偏有本末軒王荆公命名俯視巖壑

虬松參天幽邃可愛為山之絕景荆公罷相居金陵多以資產金帛助施寺中各有碑藉劉岑佛殿記梁武女永定公主捨財創精舍葉清臣為守始以禪易律元豐中主僧法泉經營辛苦成大叢林焚於建炎佛殿前大毗盧閣兩翼為行道閣屬之殿其餘堂廡極麗皆紹興以來建也淳熙十六年九月晦日又火寶公舊像父老相傳沈香為之宋初取歸京師陳軒金陵集載狄游蔣山詩云旃檀歸象魏窳堵臥煙霞謂此事迹太平興國七年舒民柯萼遇老僧往萬歲山指古松下掘之得石篆乃誌公記聖祚繇遠之文於是遣使致謝謚曰寶公妙覺治平初更謚道林真覺大師寺舊有誌公履洗鉢池寺後向東有婁禪師塔泰定二年正月寺復遺漏主僧守志極力營創至順二年九月翰林學士虞集奉勅撰碑云昔金陵有神僧曰寶誌宋元嘉中居道林寺陞齊至梁數著靈異天監十三年示寂武帝感其遺言瘞之鍾山獨龍之阜帝女永定公主表以浮圖因建

寺曰開善至宋太平興國年間太宗得誌公秘識石中符其國運有神降其宮親與之語蓋誌公云太宗異之號之曰道林真覺更名寺曰太平興國賜田以食其人及王丞相安石守金陵合諸小刹以附益之寺始大建炎燬於兵紹興更作淳熙又燬隨更作之每更作輒加大廣日葺歲增至我國家而規制之盛極矣至治辛酉匡廬僧前靈隱玉山禪師弟子守忠應請來主之禪學之士來者日滿其室今上以泰定乙丑之歲正月來至於是邦而寺適災天意若曰其撤舊而作新之乎上感焉出金幣以為民先於是行御史臺與郡縣之吏皆祇若上意始忠之治寺也舊有蒲廬之澤前見奪於豪家寺隸訟之累年不決忠之讓而弗辯奪者愧而歸之人固以是信道之矣皇上一風動之遠近雲集富者効其財貧者輸其力工則致其巧農則獻其食一歲垣廡成再歲屋室具其可以名書者曰方丈曰北山閣曰經樓曰香積曰水陸堂曰白蓮堂曰伽藍祠曰大僧

堂曰道林堂曰新倉院曰耆宿之舍而大宏興鍾二門
皆以上賜次第而成歲丁卯鑄大鍾為銅數萬斤方在
冶上賜寶珠投液中鍾成珠宛然在其上若故識之而
光彩朗發不以灼燬萬目共覩謹歎如一時上方別建
宏祠於寺北今賜名曰大崇禧萬壽寺者也是年秋歸
膺大寶是為天厯元年出詔書布德天下即命廷臣製寶
公號曰道林真覺慧感慈應普濟聖師封名香以禮祠
之出黃金白金重幣賜忠俾成寺之役蠲寺田之賦號
守忠為弘海普印曇芳禪師住持大崇禧萬壽寺而兼
領茲寺未幾加授廣慈圓悟大禪師領兩寺如故至順
元年秋御史中丞趙世安傳勅召忠入朝九月九日上
御奎章閣吏部尚書王弘以守忠入見奏對稱旨命
太禧宗禋院日給稟餼賜金襴伽黎衣與青鼠之裘十
二月一日賜設於聖恩寺迺召學士臣集至榻前命製
文以記之俾忠歸刻諸石忠以其事示臣集如此臣集
謹具載而言曰上於金陵新作之寺二曰龍翔集慶因

潛龍之舊邸也曰崇禧萬壽廣親攝之新祠也獨太平
興國雖曰宋齊梁唐宋之遺然空殿而復興實在今上
龍飛之日有運之玄契蓋自徵焉茲三寺者鼎立于一
郡以同贊乎聖天子億萬斯年之壽豈不盛哉臣集嘗
竊聞陛下之意每不欲專福于躬而欲博濟均惠於天
下敢述萬一而銘之銘曰維帝受命厥有禎符天人合
機不占以享於赫聖皇聖武之系贊于克艱神有司契
皇有萬方山川幅員釐厥下土徒御告勤顧瞻道林在
江之汜翠蓋孔旂來狩來止道林有宮百靈攸宗中有
神師民所敬恭土良泉甘風雨時若發祥效珍以待聖
作聖作孔時動天而隨龍躍以飛神師啓之神師不言
而示以兆有命方新去故以燎作而新之自我聖皇乃
祓乃除乃基乃堂日月重明天光旁燭皇心載欣萬神
降福凡我臣民息養以生飽歌煖嬉推壯耄寧裹兵以
革牛馬在野至於永久樂其休暇動孽殖亦遂以成
幽塞苦冤各啗而亨聖皇之心斯神之力銘以著之昭

示無極

半山報寧禪寺在城東七里距鍾山亦七里王荆公安

石故宅也

其地名白塘舊以地卑積水為患自荆公卜居乃鑿渠決水通城河元豐七年公以病開

神宗遣國醫診視既愈請以宅為寺因賜額報寧禪寺寺後有謝公墩其西有土山曰培塿乃公決渠積土之

地由城東門至鍾山此半道也故亦名半山寺公有謝賜寺額表云基迹荒祠冀鴻延於萬壽鈞名扁榜竊榮

過於一時臣生之寸長世叨殊獎賤息奄先於犬馬頽齡俯迫於桑榆獨念親逢莫有涓埃之補報永惟宏願

宣忘香火之因緣伏蒙陛下俯徇祈誠特加美稱所懼封人之祝終以堯辭乃塵長者之園遽如佛許仰憑護

念誓畢薰修坡詩所謂朱門收畫戟紺宇出青蓮正指此也公與其弟魏國公安禮各撰一疏延闕西人真淨

文禪師為開山第一祖道行孤特洪覺關文禪之法子也又有實禪師語錄序王旂撰米芾書陳軒金陵集載荆公半山詩凡十五首至元己卯三月遺漏至正元年住持匡廬僧元龍重建

清涼廣惠禪寺在石頭城去府城一里

吳順義中徐溫建為興教寺南

唐昇元初改為石頭清涼大道場宋太平興國五年改今額舊傳寺嘗為李氏避暑宮寺中有德慶堂今法堂前舊基是也後主嘗留宿寺中故其詩有未能歸去宿龍宮之句德慶堂名乃後主親書祭悟空禪師文亦後主自作碑刻今並存蘇東坡嘗捨彌陀畫像于寺中故東坡有詩云問禪不契前三語施佛空留丈六身慶元志寺有白雲菴見荆公詩有法眼泉名畫錄有董羽畫龍李後主八分書李霄達草書時人目為三絕按類說江南李氏時有一民死而復蘇云至冥司見先王被五木甚嚴曰吾為宋齊丘所誤殺和州降者千餘人汝歸

謂嗣君凡寺觀鳴大鍾吾受苦則暫休或能為吾造一鍾尤善後主造鍾于清涼寺鵠云追薦烈祖孝高皇帝脫出苦又蘇公妻王氏元祐八年卒于京師遺言捨所受用使其子邁迨過為畫西方阿彌陀像安于寺後有周虎石頭城三大字石刻張祐溫庭筠有詩今按唐人有詩則吳重建明矣近年殿後堂舍燬於火重修建未完

報恩光孝禪寺在府城西門內

舊為天寧萬壽寺宋紹興九年詔改今額追崇

徽宗道場泰定戊辰住持匡廬僧義深經畫重修

壽寧寺在府城北隅即舊廣孝寺基按圖經本在欽化

橋街西江寧縣治南

梁普通元年造大愛敬寺於鍾山南唐乾符中重修廣明元年改廣

明愛敬禪院南唐改廣孝禪院開寶七年徙入城中南唐張洎捨宅置淳化五年改今額慶元志壽寧禪院宋參政張洎南唐賜第也至道中捨宅為寺併城北廣孝寺入焉其孫諤云乾道志謂昔為愛敬寺者非也家集有謝表可證舊有瓊花一本內翰張瓌手植移自維揚云

崇勝戒壇院即古瓦官寺又為昇元寺在城西南隅寶錄

晉哀帝興寧二年詔移陶官於淮水北遂以南岸陶地施僧慧力造瓦官寺慶元志舊或作瓦棺者非也南史師子國晉義熙初始遣使獻玉像經十載乃至像高四尺二寸玉色潔潤形製尤殊持殆非人工此像歷晉宋在瓦官寺先有徵士戴安道手製佛像五軀及顧長康維摩圖世號三絕至齊東昏遂毀玉像為潘貴妃釵釧十國志南唐昇元二年改瓦官寺為昇元寺吳興闡為昇元闡乾道志吳順義中改吳興寺南唐改昇元寺太

平興國五年賜今額景德志淳熙中韓元吉為記每度僧於此受戒官作棺者蓋據俗說晉時長沙城隅陸地生青蓮兩朵民以聞官掘之得瓦棺葬一僧華從舌根生父老云昔一僧誦法華經萬餘部臨死遺言以瓦棺葬遂以寺名瓦棺其說迂蔓既云長沙於此無與案記謂今寺地即張昭故宅其昇元墓今寺西有寺街及石尚存

鹿苑寺舊名法光寺即梁蕭帝寺也在今城東南隅宋

絳重建蕭帝寺記畧云金陵氣王三百年聲名文物與時隆替中惟蕭梁折節以佞佛故佛之廟貌充斥江表都城巽維直淮里所有精舍馬紫峯紆餘反宇欲翔盤高孕虛含吐萬景望之輝然如脩虹亘霄丹碧相發殿有聖像即山而成追琢之功極其精妙按輿地志不知從昔之名但後人以帝氏目之黃旗運歇勢勝故在閭

唐攘據因其蹟而增華易榜法光標為勝概聖朝混一書軌以三代文教簫勺宇內四聖累洽浸厚福於生民梵刹禪林容仍舊物而茲寺垂阨痺焉不支已卯春寺僧募大姓杜德明出楮金五十萬程工就其址起高廣殿水榦不移梵捺有嚴光輝復還風物異態又粉繪釋迦文相即山塑十六大尊者生生之供稱是該脩其秋告成乃作鍾唄蒲飡以落之道俗和會園視作適青溪之水木鍾阜之雲物來入軒所相為澄曠都人詫焉有條其狀而至者會同閑趙郡李君從事海瀕謂余有一日之雅授簡不腆月而日之庶以傳久寺蓋重建於南唐保大易名法光至宋勅改今額寺後有周處書臺佛殿前有却氏窟舊傳梁武帝却后化蟒於此以天監十三年造寺國史補武帝造寺令蕭子雲飛帛大書蕭字李約見之破產載歸東洛建一小院玩之號蕭齋即此寺舊額也

嚴因崇報禪寺即景德棲霞寺在今城東北之攝山去

城四十五里

齊永平七年明僧紹捨宅為寺見江總寺碑僧紹自宋泰始中游此山刊木結茅二

十許年遂捨為寺寺有舍利塔乃隋文帝葬舍利處唐高祖改為功德寺增治梵宇四十九所樓閣延袤殿宇鱗次高宗御製明隱君碑改為隱君棲霞寺御書寺額有碑尚存字不可辨武帝會昌中廢宣宗大中五年重建南唐高越林仁肇建塔徐鉉書額曰妙因寺宋太平興國五年改為普雲寺景德五年又改為棲霞禪寺元祐八年改賜今額為叅政簡翼張璪功德寺左有千佛嶺後有天開巖碧蘚亭白雲庵迎賢石醒石中峯澗石房白雲泉亦云品外泉寺前有明僧紹高越臺山中南谷昔有天台止觀寺高僧法曠嘗於山紫澗峯下建般若堂演大論有虎穴寺在山中峯齊王融有游虎穴寺詩宋景文祁雞跡集云南齊棲霞寺大明法師好談論

手執松枝為談柄隋文帝仁壽二年送到舍利天下凡
八十一州分造塔蔣州樓霞其一也唐則天建舍利塔
於青龍山之巔唐末焚毀寺有金銀銅像背記畧云維
大唐景龍二年四月八日洛州大福先寺前樓霞寺王
比丘曇一於潤州江寧縣明隱君經坊內鑄瀉金銀銅
釋迦像三軀奉為高宗皇天大帝則天大聖皇后應天
神龍皇帝云又有石像在千佛嶺棲霞詩注云明隱君
與度法師講無量壽經西峯石壁中夜發光光中現無
量壽佛自爾捨家財鑿巖造大像坐高五丈觀音世智
立像高三丈五寸宋齊七帝造石佛千尊所謂千佛嶺
高僧傳云擇僧祐性巧攝山大像剡縣石佛等並祐經始

隆報寶乘禪寺即舊草堂寺在上元縣鍾山鄉去城十

一里

齊周顒隱居之所後顒出仕孔稚圭作北山移文
假草堂之靈以譏之高僧傳云時有釋慧約姓婁

少達妙理顯素所欽服迺於鍾山舊館造草堂寺以居之今寺左乃婁約置臺講經文之地寺後即顯舊居也唐會昌中寺廢宋復建治平中賜額寶乘紹興三十二年改賜今額

同泰寺舊志在梁時北掖門外路西南與臺城隔路寶錄

梁大通元年敕北寺寺在宮後別開一門名大通對寺南門造大佛閣七層大同十年震火所焚畧盡即更造未就而侯景亂南唐改為淨居寺尋又改圓寂寺其半為法寶寺又輿地志法寶圓寂寺即古同泰寺基龔頴運歷圖云大同元年幸同泰寺鑄十方銀像二年幸同泰寺鑄十方金像六朝事迹云梁武帝起同泰寺在臺城內窮竭帑藏造大佛閣七層為天火所焚梁帝捨身施財以祈佛福大通以後無年不幸同泰寺設四部無遮大會俄而侯景兵起陷城遂以虛器進膳自庚辰至丙戌七日不食而崩寺今廢其半為法寶寺詳見後

法寶寺亦曰臺城院乃梁同泰寺基之半也在宋行宮

北精銳軍寨內

梁大通元年創同泰寺揚吳順義二年以同泰寺之半置為臺城千福院宋改

賜今額寺前有醜石四各高丈餘俗呼為三品石政和中取歸京師或謂之關石寺前牆外有井耆老相傳為陳時臘脂井叔寶與張麗華隊而復出之所也寺基甃濶淳祐七年創置精銳軍同泰寺舊基皆為寨屋及蔬園有井在寨內蓋精銳軍寨在都統制司之後都統制司在宋行宮城之後法寶寺在精銳軍寨之後其都統制司地基及精銳軍寨基皆梁陳宮掖舊址也故景陽臺基及臨春結綺望僊三閣故址與臘脂井皆在寨內戚氏云法寶寺老僧猶能記其祖師之言謂宋行宮城後門乃梁陳宮城前門今法寶寺門牆外即梁大通門也

湘宮寺舊在青溪中橋北唐以後徙置清化市北

慶元志近

有人於上元縣治後軍營中掘出斷石上有湘宮寺三字以此知舊寺所在與實錄注合東出青溪挑花園皆今縣東地也寺本宋明帝舊宅窮極壯麗欲造十級浮圖而不能乃分為二新安太守巢尚之罷郡入見上謂曰卿至湘宮寺未此是我大功德用錢不少散騎常侍虞愿侍側曰此皆百姓賣兒鬻婦錢所為佛若有知當慈悲嗟愍罪高浮圖何功德之有上怒使人曳下殿愿徐去無異容齊始安王遙光以東府城叛蕭坦之假節討之屯湘宮寺

景德寺在城內嘉瑞坊舊崇孝寺也

楊吳置宋景德中改今額建炎初其

地為太廟徙城隍廟于旁今廟側小巷中有僧舍數間仍用寺額

證聖寺在宋行宮後

南唐保大中木平和尚居此寺故里俗至今呼為木平寺東有溝

迤邐西北接運漬今堙塞尚存遺蹟木平別有傳

寶戒寺在龍翔寺西

本毗羅寺南唐改真際寺宋開寶二年改今額

法濟寺在上元縣治東北

傳宋紹興二十七年建

封崇寺在斗門橋北

圖經舊報慈廨院近禪靈寺者寺之廢興始末未詳

治平寺在江寧舊治西南

尼寺宋開禧三年建云

大悲寺在炳靈公廟巷崇勝寺子院也

本大悲院乾道景定二志並作

寺

秀峯院舊在府城北隅

宋開寶八年廢太平興國五年重建尋又廢紹興中移于鳳臺

山西宋景定五年節使王鑑重建今為尼寺

興嚴寺舊在竹格渡之北本謝尚宅也亦號塔寺

寶錄謝尚

以永和四年捨宅造莊嚴寺宋大明中路太后於宣陽門外太社西藥園造莊嚴寺改此為謝鎮西寺至陳大建元年寺為延火所燒後五年豫州刺史程文秀更加修復李宣帝降勅改名興嚴寺紹興中徙今真武廟北

龍光寺在城北覆舟山下宋元嘉二年號青園寺

高僧傳云

竺道生後還上都青園寺寺是惠恭皇后褚氏所立本種青處因以為名其年雷震青園寺佛殿龍升于天光影西壁因名龍光宋嘉祐三年佛殿記云元嘉五年有黑龍見覆舟山之陽帝捨果園建青園寺西置龍王殿

今沼泚見存至會昌年廢咸通二年重建勅賜龍光院額續志以為在龍光門外者非也今按乾道志龍光禪院在城之西宋元嘉二年號青園寺後改額為龍光禪院以在龍光門外也會昌中廢咸通初建為月燈禪寺昇元二年重修

定林寺有二上定林寺舊在蔣山應潮井後宋元嘉十六年禪僧竺法秀造在下定林之西乾道間僧善鑑請

其額於方山重建下定林寺在蔣山寶公塔西北宋元

嘉元年置後廢宋為定林寺王安石舊讀書處

南史何增入鍾

山定林寺聽內典齊東昏侯至定林寺有沙門老病不能去命左右射之二事但云定林不知何寺

宋興寺一名興教寺在南門外

慶元志興教院即宋興寺故基在蔣山寶公塔

西二里有誌公洗鉢池陳軒金陵集載李建勲遊宋興東巖詩云幾年不到東巖下舊住僧亡屋亦無寒日蕭條何物在朽松經燒石池枯乾道間徙長干寺南亦名宋興景定志在南門外劉裕故居者非按宋興宋熙寺名相近故或疑一寺二志所載不同俟攷

高座寺一名永寧寺在城南門外晉咸康中造又名甘

露寺嘗有雲光法師講法華經於寺天花散落今講經

臺遺址猶存或云晉朝法師竺道生所居因號高座寺

乾道三年劉岑記畧云考圖志此山得名於晉永嘉中名甘露寺尸黎密多羅為王茂洪所敬故留竺生法師

繼號所居為高座梁初寶公王其寺與五百大士俱有雲光師坐山巔說妙法天花墜焉今號雨花臺則故唐盧給事中名襄字贊元者所命也寺易今名且百年矣故藏古今詩刻皆廢可攷者唐李翰林宋呂侍講王中丞三篇而已高僧傳云尸黎密多既卒塚處立寺謝鯤仍以為高座寺陳軒金陵集載蔣穎叔和王和甫雨中登高座寺詩注云寺即雲光講經雨花之地有梁時誌公二印雲公手植松猶存郭祥正詩云至今手植松十丈騰龍虬

殊勝寺在城南門外

本宋福興寺南唐後主葬照禪師於此因名塔院

吉祥寺在城南二里餘

宋治平二年賜額舊在城隍廟東後以寺基為太廟徙置于此

百福院在城南五里

梁天監中置名解脫南唐以葬證寂禪師起塔因為寂樂院後改今

名宋為樞密
王綸功德寺

均慶院在城南門外舊在金陵坊晉天寶寺唐開元十

年改天保今廢

宋開寶八年毀太平興國五年就修真觀基重置紹興初移其額於雨華臺後

壞于火因遷于臺之下今上有古塔一座即無殿舍屋宇塔前鷄宋故三藏特賜寶覺園通法濟禪師道公之

塔一十八字後有宋故三藏法師道公塔銘

佛窟寺一名崇教寺在牛頭山去城三十里

舊傳牛頭山下有辟

支佛窟宋大明中移郊壇於山之東峯執事者導從百餘人游西峯石窟見一僧趺坐執事者問之忽無所有但遺錫杖香鑪餅盂而已梁天監二年司空徐度造寺因名佛窟寺唐大歷九年代宗因感夢勅修寺之東西

峯頂七層浮圖宋太平興國二年賜令額

法性尼寺在報恩光孝觀東南本吳建初寺也

實錄云赤烏十

年胡人康僧會入境置經行所朝夕禮念有司以聞大帝引見具言佛教滅度已久惟有舍利可以求請遂於大內立壇結靜三七日得之帝崇佛道以江東初有佛法遂於壇所立建初寺在縣南二百步江東之有佛寺始於此也晉改為建寧寺至唐以來為尼寺今改法性寺建炎火舊額僅存慶元志云寺析為三近歲寺南酒務中陶竈下掘出大石佛像歸寺東院遂呼石佛院云今前法性後法性二寺隸正西隅大石佛在前寺正殿內按實錄建初本在吳宮中唐縣南二百步前志以為即此寺以古迹宣陽門及縣城互考之亦未有以證其必然若以保寧為古建初則本寺所記耳

法雲寺舊在城外東北十里圖經云本齋集善寺齊世

祖時為豫章文獻王造唐初輔公祐亂毀廢後復置為

義章院改法雲建炎兵火廢後徙置上元縣治西北

慶元

志王荆公法雲寺詩路過潮溝入九盤招提雪峯隱雲
端又云法雲但見峯細路埋桑麻舊在蔣山寺西門前

有章
義橋

正覺寺凡三其一禪寺見前其一在正西隅其巷呼正

覺寺巷按乾道志本在城南新亭壘側宋昇明元年蕭

道成頓兵新亭及沈攸之敗後乃以軍幕之地置正覺

寺尚書令王儉為碑寺久廢今寺傳自紹興十二年請
新亭額來建尋廢而寺基及寺名與巷名皆存僧興實
近以元貞二年復建隆顒繼之大德十年始完其一乾
道志在城內炳靈公廟西蔬圃中屬今正南隅

永福尼寺乾道志在廣濟倉東舊在治城東南本晉開
福寺後徙此改景福寺南唐避諱改額

乾明尼寺乾道志在城內東南祥鸞坊南唐太廟基後
主宮中置歸德永募二尼院開寶中廢移二院尼置寺

徙妙果院尼同居太平興國五年賜額

妙果寺古名翠靈宋昭憲杜太

后改乾明
今名戒壇

淨妙寺即齊安寺南唐昇元中建政和中改賜今額舊

臨官路今移置高隴而秦淮在城東門外四里

王荆公
有齊安

寺詩云日淨山如染風暄草欲薰梅殘數點雪麥漲一
溪雲今石刻尚存又有詩見光宅寺李壁注謂寺是齊
武帝宅按實錄齊武帝生建康青溪
宅後稱青溪舊宮未見改為寺也

普濟寺實錄梁大同元年置頭陀寺東北去縣二十二

里舍人石興造在蔣山頂第一峯殿後有泉井與江淮

水通隨潮水增減非常靈異累世仍舊事迹云後徙置

山下治平中改賜今額

舊寺殿後有應潮井寺西有梁昭明太子讀書臺即普通元年

所置大愛敬寺基也慶元志梁寺後有頭陀巖可容數十人陳軒集有唐李頻陪崔大夫游頭陀寺詩李浩雪

中重到頭陀詩

明慶寺屬上元縣今廢

寶錄梁天監六年置明慶寺後閤舍人王曇朗造去縣十八里

寺內有泉水清徹陳梁已前嘗取供御愈疾寺碑太子舍人陳昭之文事迹曰在蔣山上寺後別有小嶺碧石

青林幽邃如畫世人呼為屏風嶺有泉俗呼八功德水昔有高僧隱其處忽聞絲竹音俄而泉出慶元志寺廢

在鍾山南八功德水之前陳姚察就明慶寺受菩薩戒即此

天王院在上元縣靖安鎮去城十七里

梁普通二年建
初名頭陀寺建

隆四年
改今額

寶林寺在城西北二十五里舊圖云本同行寺梁天監

中武帝與誌公同遊此山見林巒殊勝命建寺因名同

行亦名聖遊寺後改為秀巖院事迹唐會昌中廢吳太

和中復建後改為秀峯院至嘉祐中改賜今額

有琪樹
在法堂

前梅摯有詩云影借金田潤香隨壁月流遠
疑元帝植近想誌公遊建炎間樹為兵所焚

祈澤治平寺乾道志在城東二十五里驛路北

宋少帝
景平元

年建梁朝置龍堂有初法師者結茅山下誦法華經有東海龍女來聽師曰此山乏水為我開一泉可乎後數日風雷良久有清泉涌座下南唐保大中以旱祈雨於舊寺基信宿而雨自後以為祈禱之所治平中改賜今額

清真寺乾道志舊名清玄寺在城北二十五里梁大通

元年置後廢唐大和中復置

慶元志舊有梁時佛像建炎兵焚陳軒集載梁立曦

次韵周撞清真寺詩
有云遺像梁朝佛

衡陽寺在上元縣清風鄉乾道志衡陽資福禪院去城東北四十里即古寶城寺基唐天祐三年徐溫重建賜今

額慶元志寺舊有齊已年儒二上人重開衡陽寺古迹
詩刻云古迹重開一朗興斷煙尋得寶階層只應雲
鶴知前事為問齊梁舊住僧廢井荒池猶浸月短松低
相欲遮燈渾于道士真高遠拋却林泉便上昇保大七
年題

本業寺在上元縣宣義鄉乾道志在城東北四十里實
錄梁天監九年置本業寺西去縣五十里比丘淨潔造
在蔣山里

隱靜院在上元縣宣義鄉乾道志在城東近鴈門山去
城四十里梁天監二年建初名永建寺南唐保大中重

修改今額

實錄梁天監二年李師利造永建寺北去縣六十里寺有乾德四年石刻云唐上都左街

鴈門隱靜院始建於宋元嘉廢於唐會昌乾德二載耆艾詣南唐主請重建焉

延祥院在上元縣神泉鄉乾道志聖湯院在城東南六

十里湯山下

唐德宗時韓滉為浙西觀察使滉小女有惡疾浴於湯而愈乃以妝奩建寺於湯山

之右慶元志聖湯延祥院慶元三年改為十方禪院

杜桂院在上元縣丹陽鄉乾道志在城東南六十里南

唐保大六年建在杜桂村因為院額今名香林寺又曰

香林院在赤山西

慶元志院有吳鍾記云梁天監中杜桂二卿平章朝捨所居以為寺故

從其姓
以旌名

上雲居下雲居二院上雲居院在鍾山之右去城十二里舊圖經云本齊勝善寺建武二年南海王蕭子罕造梁時尼所居後復為僧院下雲居在上雲居右宋元嘉中置初為善居寺後改今額

了緣塔院乾道志在鍾山後梁普通中置初為福靜寺南唐保大九年改今額

澄心院乾道志在鍾山西去城十里

淨隱院乾道志在鍾山寺前

梵惠院乾道志在蔣廟前去城十五里

清果院乾道志在鍾山後去城二十五里

永慶院乾道志在北門外烏龍潭北

定明院乾道志在覆舟山下去城五里

解空院乾道志在西門外清涼寺側

資福院乾道志在城東南十五里土山側梁建今亦名

淨名院

莊嚴院乾道志在淳化鎮東去城三十五里

漆閣院乾道志在城東五十里

光相院乾道志在西張村去城五十五里

觀音院乾道志在城東六十里黃干村梁天監中置至
開寶八年廢後復建於本院之蔬圃

樂林院乾道志在城東南六十里因齊古寺基

方樂院乾道志在城東北六十里神泉鄉本梁方樂寺

基南唐昇元元年重建今亦名常樂院

玉泉院乾道志在城東北六十里本古泉院基吳武義

中徐溫重建

多福常樂二院乾道志各在上元縣神泉鄉去城六十里

延福禪寺乾道志在城東南六十里梁普通中為靜福院南唐時修改今額

永福院乾道志在城東六十里青草村

安平院乾道志在下橋村去城八十里

登臺院乾道志在黎塘村去城九十里

淨土院乾道志在葉墅村去城九十里

保福院乾道志在盡節鄉龍澗村去城百里

慈光院乾道志在章墅村去城百里

妙明院乾道志在道德鄉東湖村去城九十里

宗勝院乾道志在道德鄉埂頭村去城百里

淨嚴院乾道志在紫草村去城百里

無垢院乾道志在禪林村去城一百二十里

陽城院乾道志在盡節鄉周墟去府城一百二十里

自上雲居院而下至陽城院並屬上元縣

崇因寺在城南十二里舊圖經云本宋曠野寺齊廢梁

大同中復唐開元中改禪居院吳大和二年改崇果院

宋改今額

慶元志崇因寺陳軒金陵集劉誼詩云十里崇因寺臨江水氣中寺有觀音畫像東坡頌

李端叔跋曰吾卜葬亡妻崇因長老欽公謂余曰子胡不禱觀音東坡南遷嘗禱而應遂作頌前人已為刻石

後有詔所在東坡文皆燬前人不敢違余問石所在曰幾碎矣索之力乃得於庫中米廩後塵土深數寸稍曳

出加湔洗而粲然如未嘗毀者蓋先是刻馬祖龐居士用其餘刻頌像已斷裂而頌獨全東坡序云金陵崇因

院長老宗襲自以衣鉢造觀音像極相好之妙余南遷
謁而禱焉曰北歸當復過此而為頌建中靖國元年五
月一日自南海歸
至金陵乃作頌

普光寺在城南門外

乾道志宋置為天王寺至梁為昭明太子果園吳為徐景通園南唐

保大四年更置奉先禪院葬曇雲師起塔因名寶光塔院今名普光寺

瑞相院亦名鐵索寺在城南門外

乾道志本晉時尼寺宋元嘉七年西域梵

尼七人至建業十一年尼鐵索羅等三人又至因號鐵索羅寺宋齊以來或為翠靈寺或為妙果寺開寶八年燬太平興國二年有僧請其地重興瑞相禪師塔因改今額

國勝寺在南門外落馬澗去城二里餘

乾道志舊在橫山北陳天嘉元

年章后捨
宅為寺

安隱院在雨華臺後向南百餘步

乾道志舊在蔣山後
久廢紹興四年郡人

請額
置

崇福院乾道志在城南門外

宋元嘉十年因僧楚雲所
居號崇福至太平興國八

年
修

明覺寺乾道志在菜園務

詳見光宅
寺注語

無相塔院乾道志在城南七里

南唐葬清闕禪師起塔
因名無相塔院韓熙載

為碑
今存

歸寂塔院乾道志在城南七里

宋泰始二年建初號永安寺院唐保大二年起

塔號歸寂

因名院

福安院乾道志在城西南新林市東去城二十里俗呼

祝英臺寺

光宅寺乾道志本梁武帝故宅捨作寺靈光法師講法

華經于寺每有華如飛雪滿空講訖即升空去寺今廢

其故基在城東南七里嘗建明覺寺後徙置黃闕塘側

治平二年賜額

按王荆公光宅寺詩凡三其一曰今知光宅寺牛首正當門臺殿金碧毀院落

桑竹繁蕭蕭新續臥冉冉暮鴉翻回首千歲夢雨華何足言其一曰脩然光宅淮之陰扶輿獨來坐中林千秋鍾梵已變響十畝桑竹空成陰昔人倨堂有妙理高厓翳遠天花深紅葵紫覓復滿眼往事無蹟難追尋其一曰齊安孤起宋興前光宅相仍一水邊蜂分蟻爭今不見故窠遺址尚依然李壁注曰光宅寺梁武帝宅也其北齊安寺隔淮齊武帝宅也宋興又在其北齊安今為淨妙寺前臨官路後據高隴面淮又按實錄天監六年置光宅寺西關縣十里武帝舊宅造寺未成於小莊嚴寺造無量佛像長丈九尺未移前淮中估客夜輒聞大橋上數百人修道往視不見人俄而像度光彩輝煥東都記云秘書省內著作院後有梁武帝及名臣沈約范雲周興嗣已下王公數十人銅像初武帝登極乃立私宅為寺寺內有此像後長慶中李千里為明堂採木使舩載至東都置於省內今新亭鄉有此寺去城二十餘里牛首山之側蓋後用古額建爾

延壽院乾道志本幽棲寺在城南四十里祖堂山南唐貞觀中四祖道信禪師傳心印於此光啓四年廢吳太和二年重置改今額

福昌院乾道志院本資善院在城南四十里牛頭山前古常樂寺基與延壽院相鄰唐天祐中置南唐後主改今額

看經院乾道志在城南四十里建隆二年置地名任店

淨果院乾道志在城南五十里吉山南本梁永泰寺基
南唐葬淨果大師起塔因名淨果塔院

淨居院乾道志在城南五十里本唐天福寺會昌中廢

南唐時復置為淨住院治平二年改今額

按實錄梁天監五年置淨

居寺北去縣六十二里潁州刺史劉威造蓋即此也

大仁院乾道志在城南七十里近慈湖界

唐明宗時有僧結茅於此

講仁王經南唐給額為仁王院治平二年改今額

高公臺院乾道志在城南八十里

宋景平元年置古臺猶存

永慶禪院乾道志在江寧鎮南去城五十里

清脩院乾道志在江寧鎮東去城六十里治平二年賜額

俗呼青山寺

案青山之名當是
幽巖見山川志

旌忠禪院乾道志在城西南五十八里紹興二十六年

賜額為秦申王墳寺今為天禧寺下院

移忠報慈禪院乾道志在牧牛亭路東去城西南六十

八里紹興十五年秦申王請為功德院

寺有秦熺所造
鍾鷄云紹興十

五年歲在乙丑移忠報慈禪院告成資政殿學士太中
大夫提舉萬壽觀兼侍讀兼提舉秘書省江寧縣開國

伯食邑七百戶食實封一百戶賜紫金魚袋秦熿謹造
大鍾真歇禪師清了銘曰以大圓覺為我伽藍十方刹
海真淨本安衆生自妄性昏擾擾一聞此鍾亂想俱掃
功流浩劫圓音廓徹誰苦誰辛一時永歇近年住持僧
元達重修寺宇

資聖院乾道志在城西南六十里梁武帝置在白都山
側俗呼白都院

佛龕院亦名慈相乾道志在城西南六十里上公山梁

佛壇寺基

南唐保大十二年重置治平二年改慈相院
一說吳赤烏二年置廣濟山佛龕院即此

淨相院乾道志在城西南六十里唐天祐十八年建南

唐後主給額為泗州塔院至崇寧中改今額俗呼後籬寺

廣教院乾道志在城西南六十里治平間賜額

禪居院乾道志在城西南六十五里

唐大厯二年置會昌五年廢至太平

興國五年修

後陽院乾道志在城西南七十里

係萬回道場開寶八年賜額在後陽村因

名

隆福院乾道志在城西南七十里陸塘橋石堰口治平

二年賜額

福興寺乾道志在城西南七十五里天竺山下

按實錄大同二

年袁平造福興寺東北去縣百里詳見山川志內

何城寺乾道志在城西南何湖側去城八十里

旁有王祥墓

清福寺乾道志在秣陵鎮東去城五十二里

興善院乾道志在秣陵鎮西北張山下去城五十五

里

國安寺城東南六十里齊永明元年賜額

僧法珍立石可

考

真如院乾道志在城東南六十里治平間賜額

棲隱院乾道志在橫山北金陵鎮東去府城六十里

慈證寺乾道志在金陵鎮南去城六十五里

建昌院乾道志在橫山南澗山村去城八十里

西陽院乾道志在金陵鎮南去城七十五里

廣覺院乾道志在橫山北去城七十里治平二年賜額

其地名北湯村俗呼北湯寺

明性院俗呼董青院乾道志在城南石塘村西里山去城八十里治平二年賜額

隆教院乾道志在城東南八十五里梁大同二年建初號金口寺蓋里名也楊吳順義二年改靈鷲院治平元年改今額

白塔寺在江寧縣治東烏衣巷

即葬大唐三藏大遍覺法師玄奘頂骨舍利之

塔詳見天禧寺下

法王寺在白塔寺東

東晉末龜茲國沙門鳩摩羅什以道開于時隆安三年遣使往姚秦

迎致泰已尊為三藏國師留不遣晉使再三徵請既至
帝躬出朱雀門迎之歷試神驗待之如禮施地建寺賜
法王之額請什居焉遂尊為譯經二藏國師歷年既久
寺亦燬廢至順間天禧主僧演與其屬法嵩德賓仍其
遺址構寺一新寺中恒產不滿百石歲
時所用悉出天禧今為天禧寺下院

自崇因寺至此並屬江寧縣

崇明寺乾道志在句容縣東晉咸寧元年居士司徒察
捨宅為義和寺唐會昌中廢天祐二年重建太平興國

五年改今額

縣志寺額義和之寺四字梁昭明太子書尚存鍾樓俗傳般若所造為其巧也今寺

分為子院十七曰文殊院尹孺文張安國嘗訪璚無玷于定菴終日而去曰經截禪院塔院羅漢院有塔影曰

關應院瑞像關王院彌陀院四聖院千佛院天竺院
妙雲院妙音院眼藥院北觀音院北釋迦院中釋迦院

南釋迦院內經藏係禪寺云

興教院乾道志在句容縣東北舊經云晉咸淳中置為觀音院南唐時重修太

平興國五年改今額

金華寺乾道志在句容縣東南晉咸康三年尚書令李邕捨宅造靈曜尼寺尋

改額

聶行寺在句容縣西五里聶行山或云元在洪水坑

圓寂寺在句容縣南三十五里赤山側

龍華寺在句容縣赤山上

奉聖院舊名永定在句容縣東四十里

梁大同二年置

延福院舊名延壽在句容縣東四十里

晉咸平六年置

大泉寺在句容縣東北五十里

宋昇明二年邑人顏繼祖捨宅為寺今徙置縣

北唐巷村

天王院在句容縣南五十里

唐中和二年建

果報院舊名正覺寺在句容縣北六十里

揚吳順義中建縣志唐懿

宗咸通中建名正覺

關院在句容縣北六十里

唐咸通中賜額

關院在句容縣北六十里

關院舊名寶公院在句容縣西北六十里

梁天監中置即沙門

寶公所居也唐乾符二年賜今額

關寺在句容縣西北六十里

慶元志寺舊基在蔣山寶公塔關桃花塢側梁

劉訐與族兄關聽講鍾山寺因而卜築寺東澗有終馬之志關王規復為散騎常侍太子中庶子步兵校尉以

疾不拜於寺築室居焉淳熙十一年僧淨德移鍾山廢額於縣北東陽鎮建寺號寶公塔院寶公生鷹窠中即

其地也

戊山尼寺乾道志在句容縣北六十里唐景福中建
元慶

志在下蜀鎮有照
首座塔韓子蒼銘

光宅寺在句容縣東十里

禪心寺在句容縣東三十里乾道元年請額

明慶院在句容縣東四十五里

紹興二十一年樞密
巫伋請功德院賜額

昭聖寺在句容縣東四十五里地名東昌

乾道七年請
溧水州廢額

建

興教院舊名永安院乾道志在溧水州西三百步臨淮

門外唐天復元年置大中祥符四年改今額淳熙八年
為禪院舊經又謂本名永廣楊吳時縣令孔敷祐奏為
藝皇崇修更名興教今為禪寺

開福禪寺舊名天興在溧水州南門外唐開元二十二
年修會昌五年廢天祐初重建至太平興國五年改今
額淳熙十三年請為禪院

菩提寺舊經尼院在溧水州東三百步尋僊門外唐乾
符中置

法華寺舊經尼寺在溧水州西一里

唐天祐
中建

崇慶寺在溧水州東南八里

鴻鶴禪師在東廬山建道
場後至中山西建寺唐大

中二年立大覺寺額至太平興國五
年改今額建災兵燬餘枯檜二株

馬占寺在溧水州東二十五里本六朝古寺基

開寶五
年修舊

記無考相傳馬尚書於此讀書
不知何代人紹興八年重建

興化禪寺舊名豐安寺在溧水州北二十七里唐大中

中建至太平興國五年改今額淳熙六年請為禪院

明覺寺舊名正覺在溧水州西四十里唐咸通十年置

大順中改今名至治平二年賜額

廣嚴寺舊名儀城在溧水州西北四十五里唐天復三年置治平中改今額縣丞俎大武有記

儒童寺舊名孔子寺在溧水州南七十五里大唐景福

二年置南唐昇元二年改今額舊傳孔子適楚經此地後人因建祠尋改為寺

慧照寺舊名禪林寺在溧水州南八十里唐開元二十

七年置太平興國五年改額

彰教寺舊名報恩寺在溧水州西南八十里唐大中七

年置

報恩寺
有碑

淨行寺舊名潘城寺在溧水州西南九十里唐中和三

年置

寺有碑
唐進士劉驥文

保聖寺舊名龍城寺在溧水州西南百里唐貞元十七

年置寺之西林即舊基也後祥符中改今額

龍城保聖
二碑並存

淳祐中胡
應發有記

彌勒寺在溧水州南游山鄉紹興二十七年興廢建

寺

萬善寺在溧水州東南唐昌鄉乾道二年鄧步鎮申府
請額移於東埧鎮建

顯慈寺舊名劉莊寺在溧水州西南百三十里至太平
興國二年復建大觀元年改顯仁院紹興三十年又改
今額

大覺寺本大通寺在溧水州北十五里梁大通九年置
治平中改今額

新化寺在溧水州南儀鳳鄉乾道三年移建安興鄉

三塔大聖院東晉為白龍寺在溧陽州西七十里故傳

僧伽大聖行化之地有三塔存焉

縣志昔錢氏奪南唐地作鐵梁堰為厭勝

禪院因廢獨存一塔治平中僧奉琳建有寒光亭

觀音菴在城東南隅宋咸淳八年建

清福菴在城正北隅宋景定二年僧覺清建

常照菴在城正北隅大德二年平章呂文煥建

大夢圓通菴在城東南隅至元年間左丞廉希愿建

大夢觀音菴在城西北隅料院街大官朔思吉所建

崇福菴在城正南隅臘脂菴至大己酉年建

無際崇福菴在城正南隅泰定丙寅年楊遇新建

古佛菴在城東南隅貢院街放生池畔古有中廢至正

元年重建

法海菴在城東南隅大夢菴側至元元年建

寶公菴在城正東隅元貞年間僧劉空瓶為寶公堂後
民劉氏捨地命僧法通重建為菴

千子亭觀音菴在城正東隅上閘街延祐三年蔣山寺

僧智堅募緣建

普照菴在城正南隅至大四年僧無盡建

月印菴在城正南隅大德五年僧無可建

淨土菴在城正南隅僧宗義建

華嚴菴在城西北隅泰定元年僧善果建

佛光菴在城正北隅至治元年建

寶公道林菴在江寧縣治南至大年間建今為蔣山寺

下院

溧水州有井岡菴壽國禪菴觀音菴亭山菴皆歸附後僧俗所建

大通尼寺即大通菴宋咸淳元年建郡守馬光祖立石菴本在御街南隅劉觀察虎子婦秀巖落髮為尼移菴額於秦淮南杏花村內建今寺

上國安寺古係崇勝寺又名大悲院在府城南隅炳靈公廟街宋乾道七年僧法灋重建九年改今額

均慶尼寺在府城東南隅武定橋下馬道街內宋咸淳

年間建


正等寺在府城東北隅宋咸淳四年郡守馬光祖建

天王寺在府城東北隅宋咸淳年間僧玉菴建舊名天王菴至泰定初建康路總管博斯呼實保改額為寺

彌陀菴係宋興元酒庫及公使庫地基歸附後建菴在府城內

凡寺觀菴院稱在城某隅及去城若干里皆指今府城即南唐建都所築城也除古蹟城外他志內

言城倣此



至大金陵新志卷十一下